


續文獻通考鈔

選舉

學校

十九




漢書門				
類	號	函	架	冊
三	三	三	三	三
三	三	三	三	三
三	三	三	三	三

內閣文庫			
類	號	冊	函
三	三	三	三
三	三	三	三
三	三	三	三
三	三	三	三

內閣文庫	
番號	漢 2433
冊數	20 (13)
函號	294 17

政書八号

共二十



續文獻通考鈔卷之九

古燕 羅 森約齋定

雲間 王 圻元翰著

秦郵 孫宗夔考則鑒

廣陵

李 蘅杜若正

孫安祖無燁閱


史繼瑗如遽較

選舉考

宋寧宗嘉定二年罷法科試經義六場舊法 六年復法科試經義法

仍命雜流進納人毋得試 十二年詔侍從兩省臺諫各舉文武可用之才二三人

理宗寶慶三年御筆賜程秘以下曰國家三歲取士試于南宮蓋公卿大夫由此其選事至重也朕屬在哀疚未遑親策爰咨近列往司衡鑑卿等宜協心盡慮精加考擇夫文辭浮靡者必非偉厚之器議論詭激



淺草文庫
史以甲子仁鈔

者必無正平之用去取之際其務審此

龜鑑曰文辭浮靡者必非偉器議論詭激者必非正才此丙戌禮闈之御筆也其求賢務實之意爲至勤至如己丑則又以取人器識得士忠厚爲衡鑑壬辰則又以先器識後詞藻務忠實斥浮僞爲權衡則求賢務實之意益堅

端平二年詔曰國家進士科得人爲盛比年場屋循習寬縱易卷假手懷挾傳義之弊色色有之深恐真才實能無以自見可令監試官嚴行覺察犯者依貢舉條例取中人就尚書省覆試以副親策之選

淳祐四年初命監察御史一人銓試仍添差點檢雷同官一員

中書舍人虞儔上劄曰國家取士之制有經義有詩賦自紹興分科以來士子不過各專習其一以應上之科目今之所謂考官者其向之進取蓋不過工於一而已矣若以經義之人而考詩賦則恐於聲

律未能細評以詩賦之人而考經義則恐於旨趣未能深究又六經之中率是互考其春秋之凡例二禮之制度易之象數倘非素習未免有所舛悖往往去取高下顛倒謬誤不厭士論何所不有是猶衡不平而欲權物之輕重鑑不明而欲別物之妍醜雖欲勿失其可得乎伏望聖慈明詔大臣將省試參詳點檢等官凡六經詩賦於朝士中選其所素習者使各有其人仍詔知舉隨其所習分隸考校庶幾士子所業衡鑑不逃去取高下咸得其當以副國家取士之意天下幸甚

十年詔國家以儒立國士習熾惡治道所關端平初增諸郡解額寢漕闡牒試正欲四方之士安鄉井脩孝悌以厚風俗比歲殊失初意可令逐州於每舉待補人數內分額之半先就郡庠校以課試取分數及格者同待補生給據赴上庠補試其大府一體施行

禮部侍郎曹彥約奏科舉之弊莫甚於牒試而牒試之弊莫甚於作
偽蓋解額之有廣狹士子之有衆寡廣而寡者固已安其分則狹而
衆者必思所以爲之計朝廷以承平日久士子日盛設爲牒試之法
寬其進取之門未節細故未暇深察於是改鄉里以就他人之貫改
三族以認他人之親甚者改其父祖改其姓氏若得若失尚未可知
而欺君之迹已昭昭不可掩矣今國子監牒試其弊尚少臣不知其
其本末未敢遽議惟是漕試之弊積習既久士大夫互相欺詐恬不
爲恠壞士子心術莫甚于此今欲增解額則艱立限制欲均解額則
侵及他郡欲廢漕額以益諸郡不特舊額不等極費區處而所部之
親戚故舊有決不可不避者變舊法以起爭端終不可久無已則有
一焉在內有職事官朝廷之所選用也在外有監司帥守朝廷之所
責任也大郡之有通判小郡之有僉判轉運司之有主管文字諸路

之有川廣福建又遠地之多士子處也與其詐僞避親而使之冒試
孰若嚴其保任而使之牒試隨其官職分其等差若監司帥守可舉
十五人則大郡可舉十人中下郡可舉七八人通判可舉五人主管
文字與僉判可舉三人川廣福建不在此位者不過一二人職事官
之牒門客者當如其舊其以川廣福建牒者郎官以上不得過下郡
之數寺監丞以下不得過通判之數明載之於公牘參之以法令曰
此某人者乃某人之子若弟也某之親若故也或曰雖非某之子弟
某之親故而某前知其爲人其居鄉無失行也其家世非逆惡也其
場屋無殿舉也其親屬無喪服也後有異同甘朝典不辭也如是而
行之與今時牒試之法無以大相過不增發解不拂人情而解額之
狹處與士子之衆處受其利如前日也但前之爲法不許其保任而
容其詐僞後之爲法不容其詐僞而許其保任其利害相去何如哉

但今歲科舉在近，難以驟變舊規，亦不敢以鄙陋愚見以為盡得天下士子之情，欲望聖慈下此說付禮部監學熟議之，與大臣圖維之。如或可行，以備戊子歲漕試科舉之用，恐於名教亦有萬一之輔。十二年上諭輔臣曰：邇年科舉取士，鮮得實學，士風人才關係氣數，何策以救之。吳潛奏乞于省試額中輟一二十名，令有司公舉海內行義文學之士，庶尚存鄉舉里選微意。曩時朱熹真德秀亦有此請。

太常寺丞牟滌奏曰：士方其未得也，奔競苟且，不知有義命，故其既仕也，攫拿貪黷，但知有利祿，未仕則有科舉之累，既仕則有薦舉之累。人才所以日不逮古，而或者遂謂士習不正，由二者陷溺其心也。臣獨以為不然。先朝范鏐以奏名第一，唱第殿庭，自來唱過三名，則奏名之首者必抗聲自陳考校，雖在下天子亦擢實上列，鎮獨耻於自陳唱至七十九名，然後出而就列，其後進退出處有古人風，遂為

國朝名臣科舉，而得若人，則浮薄者自知愧矣。張忠定詠凡所薦舉，皆方廉恬退之士，且曰：奔競者將自得之，何暇吾舉薦。舉薦而得若人，則奔競者革心矣。然則科舉何嘗壞人，士實自壞耳。薦舉何嘗累人，士實自累耳。故臣謂獎恬退抑奔競，正人心之第一義也。

詔省試中進士人覆試于御史臺為定制。

景德五年春正月，詔崇經術考德行，詔畧曰：我國家因唐之舊，進士一科得人為盛。三百年間，所以保乂王家，垂休億載者，厥功茂哉。弊久蠹滋，近年尤甚，非無佳士穎出，由此其選然窮經學古者，或病于詞華，植德礪行者，難究其蘊奧，高才大器者，往往局於纖悉繩墨之末，是以官甚冗而才愈乏，家殊俗而風益漓。至於冒國法以苟營假儒冠，而挾策俚言，亂雅勳說，趨時使習之者，反賊其良而取之者，莫任其咎。人情至此，咸欲變通，蓋嘗披閱先朝名臣奏議，其論取士之法，非一，惟程顥程

願深知治道酌古通今綱目詳明用意純切令三省詳議參酌其可行者條具以聞務於科舉無大更張以安士心而於進士舉之外所以崇尚經術考察德行選用材能之道立爲一代之典陶成四方之風庶幾豐芑之仁垂之萬世顧不美歟

度宗咸淳七年十二月初置士籍

王氏曰按宋史言賈似道欲制東南士心乃令御史陳伯大請置士籍開具姓名年甲三代妻室令鄉鄰結勘於科舉條例無礙方許納卷又嚴後省覆試法比校中省元卷字蹤稍異者黜之覆試之日露索懷挾有李鈞孫者少時戲雕股間索者視之駭曰此文身者事聞被黜時邊事危急束手無策而以科舉累士人議者訾之

九年詔舉士以明體適用之學

遼聖宗統和六年詔開貢舉一人及第三月宋進士挈家來歸者十七人命有司考其中第者補國學官餘授縣主簿尉

太平五年十一月幸內菓園宴京民聚觀求進士得七十二人命賦詩第其工拙以張昱等一十四人爲太子校書郎韓欒等五十八人爲崇文館校書郎

九年皇城進士張人紀趙睦等二十二入朝試以詩賦皆賜第

十年七月詔來歲行貢舉法

興宗景福五年十月御元和殿以日射三十六熊賦幸燕詩試進士于庭賜馮立趙徽四十九人進士第以馮立爲右補闕趙徽以下皆爲太子中舍賜緋衣銀魚遂大宴御試進士自此始

十九年六月詔醫卜屠販奴隸及悖父母或犯事逃亡者不得舉進士道宗咸雍九年以馬希白詩才敏妙十吏書不能給召試之

天祚帝乾統五年十一月禁商賈之家應進士舉
金設科皆由遼宋制有詞賦經義策試律科經童之制

天德三年罷策試科至大定十一年勅置女直進士科初但試策後增
試論所謂策論進士也明昌初又設制舉宏詞科以待非常之士故金
取士之科有七焉其試詞賦經義策論中選者謂之進士律科經童中
選者曰舉人凡諸進士舉人由鄉至府由府至省及殿廷凡四試皆
中選則官之至廷試五被黜則賜之第謂之恩例又有特命及第者謂
之特恩恩例者但考文之高下爲第而不敢黜落凡詞賦進士試賦
詩策論各一道經義進士試所治一經義策論各一道其設始于天會
時

太宗天會元年十一月時急欲得漢士撫輯新附故設科取士無定數
亦無定期至明年二八月凡再行

五年河北河東初降職員多缺以遼宋制不同詔南北各因其所習
取士號南北選

海陵貞元元年定貢舉程試修理格法

十二月特賜貴妃定哥家奴孫梅進士及第

正隆元年命以五經三史正文內出題始定爲三年一舉

世宗大定十六年四月定宗室宰相子程試第等

十九年謂宰臣曰自來御試賦題皆士人嘗擬作者朕前自選一題出
人不料故中選皆名士而庸才不及是知題難則名儒可擅場題易則
庸流易僥倖也平章政事唐括安禮奏曰臣前言士人不以策論爲意
正爲此耳宜各場通考選文理俱優上曰并答時務策觀其議論材自
可見卿等其議之

章宗明昌元年正月言事者爲舉人四試而鄉試似爲虛設當罷去其

續文獻通考卷之九
府會試乞十人取一人可以群經出題而註示本傳上是其言詔免鄉試其府試以五人取一人仍令有司議外路添考試院及群經出題之制有司言會試所取之數舊止五百人比以世宗勅中格者取乞依此制行之府試舊六處中有地遠者命特設三處上京咸平府路則試于遼陽河東南北路則試于平陽山東路則試于益都以六經十七史孝經論語孟子及荀揚老子內出題皆命于題下註其本傳又諭有司曰舉人程文所用故事恐考試官遽不能憶誤失人才可自註出處註字之誤不在塗註所限之數

二年尚書省奏提刑司察舉涿州劉器博張安行河中府胡光謙年雖八十三尚可任用勅劉器博張安行特賜同進士出身胡光謙召赴闕八月特賜胡光謙第三甲及第授將仕郎太常寺奉禮郎官制舊設是職未嘗除人以光謙德行才能特授

十月詔諭尚書省訪求博物多智之士賜河南路所舉逸民游總同士出身以年老不樂仕進特授登仕郎給正八品半俸終身

十一月尚書省奏翰林侍讀學士党懷英舉孔子十八代孫端甫年德俱高該通古學濟南府舉魏汝翼有文章德誼苦學三十餘年已四舉終場蔚州舉劉震亨學行俱優當克舉首魏汝翼特賜進士及第劉震亨等同進士出身並附王澤榜

承安四年上諭宰臣曰一場放二狀元非是後場廷試令詞賦經義通試時務策止選一狀元宰臣曰唐以來取士專以詞賦爲重餘雖有明經法律等科止同諸科而已至宋王安石爲相作新經義取人且詞賦經義人素所服習之本業論則兼習者也今捨本業取兼習恐不副陛下公選之意遂定御試同日各試本業詞賦依舊分立甲次第一名爲狀元經義魁次之恩例與詞賦第二人同餘分爲兩甲中下人並在詞

賦之下

十二月更定科舉法策論二人取一詞賦經義五人取一五舉終場年四十五以上四舉終場年五十以上者受恩五年五月定策論進士及承蔭人試弓箭格

又詔考試詞賦官各作程文一道爲舉子式試後赴省藏之張行簡轉對言擬作程文本欲爲考試之式今會試考試官御試讀卷皆居顯職擢第後久離筆硯令臨試擬作稍有不工徒起謗議詔罷之

泰和七年

十二月詔策論進士免弓箭擊毬

金自太和大安以來科舉之文其弊益甚蓋有司惟守格法所取之文卑陋陳腐苟合程度而已稍涉奇峭卽遭斥落于是文風大衰貞祐初趙秉文爲省試得李獻能賦雖格律稍疏而詞藻頗麗擢爲第一舉人大喧噪愬于臺省以爲趙公大壞文格且作詩謗之久之方

息俄而獻能復中宏詞入翰林而秉文竟以是得罪

策論進士本選女直人之科也始世宗大定四年命頒行女直大小字所譯經書每謀克選二人習之尋欲興女直字學校猛安謀克內多擇良家子爲生諸路至三千人九年選異等者得百人薦于京師廩給之命溫迪罕締達教以古書作詩策後復試得徒單鑑以下三十餘人十一年始議行策選之制至十三年始定每場策一道以五百字以上咸免鄉試府試止赴會試御試且詔京師設女直國子學諸府設女直府學擬以新進士充教授以教士民子弟之願學者俟行之久學者衆則同漢進士三年一試之期乃就閔忠寺試夜半聞塔上有樂聲入官考官完顏蒲湟等喜爲得賢之祥中選者得徒單鑑以下二十七人十六年命皇家兩從以上親及宰相子直赴御試皇家袒免以上親及執政官之子直赴會試至二十年以徒單鑑等

教授中外其學大振遂定制以策詩賦三場策用女直大字詩用小字程試之期皆用漢進士例焉

進士所歷之階及所循注之職貞元元年制南選初除軍判丞簿從八品

次除防判錄事正八品三除下令從七品四中令推官節察判正七品五

六皆上令從六品北選初軍判簿尉二下令三中令四上令已後並上

令通注節察判推官

世宗大定十九年命狀元本貫察其行止美惡

二十二年勅進士受章服後再試時務策一道所謂策試者內才行可取則籍其名後察其政若言行相副則陞擢任使

元初太祖始得中原輒用耶律楚材言科舉選士世祖既定天下王鶚獻計許衡立法事未果行至仁宗延祐間始斟酌舊制而行之取士以德行為本試藝以經術為先士裒然舉首應上所求者皆彬彬輩出矣

然當時仕進有多岐銓衡無定制其出身於學校者有闕于監學有蒙与字學回回國學有醫學有陰陽學其策名於薦舉者有遺逸有茂異有求言有進書有童子其出於宿衛勲臣之家者待以不次其用於宣徽中政之屬者重為內官又蔭敘有循常之格而超擢有選用之科由直省侍儀等入官者亦名清望以倉庾賦稅任事者例視冗職捕盜者以功敘入粟者以貲進至工匠皆入班資而輿隸亦躋流品諸王公主寵以投下俾之保任遠口外徵授以長官俾之世襲凡若此類殆所謂吏道雜而多端者歟矧夫儒有歲貢之名吏有補用之法曰掾史曰令史曰書寫銓寫曰書吏典吏所設之名未易枚舉曰省臺院部曰路府州縣所入之途難以指計雖名卿大夫亦往往由是躋要官受顯爵而刀筆下吏遂致竊權勢舞文法矣故其銓選之備考覈之精曰隨朝外任曰省選部選曰文官武官曰考數曰資格一毫不可越而或援例或

續文獻通考卷之九
借資或優陞或回降其縱情破律以公濟私非至明者不能察焉是皆
文繁吏弊之所致也

太宗九年秋入月下詔命斷事官木忽解與山西東路課稅所長官劉
中歷諸路考試以論及經義詞賦分爲三科作三日程專治一科能兼
者聽但以不失文義爲中選其中選者復其賦役令與各處長官同署
公事得東平楊英等若干人皆一時名士而當世咸以爲非便事復中
止

世祖中統四年九月翰林學士承旨王鶚等請行選舉法遠述周制次
及漢隋唐取士科目近舉遼金選舉用人與本朝太宗得人之效以爲
貢舉法廢士無入仕之階或習刀筆以爲吏胥或執僕役以事官僚或
作技巧販鬻以爲工匠商賈以今論之惟科舉取士最爲切務矧先朝
故典尤宜追述奏上帝曰此良法也其行之中書與翰林學士議立程

式又請依前代立國學選蒙古人諸職官子孫百人專命師儒教習經
書俟其藝成然後試用庶凡勲舊之家人材輩出以備超擢

成宗時翰林學士王惲上奏曰宋易明經爲經義其試義法度嚴備
考較公當至亡金極矣後世有不可廢者然論程文者謂學出剽竊
不根經史又士子投牒自售行誼蔑聞廉耻道喪甚非三代貢士之
法夫古貢士率從學而出後世不詢經行徒採虛譽因循薦舉徃爲
私恩不顧公道此最不可者也莫若取唐楊綰宋朱熹等議而用之
可行于今縮之法曰令州郡察其孝友信義而通經學者州府試通
所習經業貢於禮部問經義十條對時務策三道皆通爲上第其經
義通八策通二爲中第其孝經論語孟子兼爲一經熹之議曰分諸
經史如易詩書周禮二戴禮經春秋三傳各爲一科將大學中庸論
孟分爲四科並附已上大經逐年通試及廷試對策兼用經史斷以

續文獻通考卷之九
已意以明時務得失。愚謂爲今之計，宜先選教官，定所明經史爲所習科目。以州郡大小限其生徒，揀俊秀無玷污者，克員數以生徒員數限歲貢人數。期以歲月使盡修習之道。然後州郡官察行攷學，極其精當，貢於禮部。經試經義作一場，史試議論作一場，廷試策兼用經史，斷以已意以明時務。如是則士無不通之經，不習之史。進退用舍一出於學。既復古道，且革累世虛文妄舉之弊，必收實學適用之效。豈不偉哉！外據詩賦立科，旣久，亦不宜驟停。經史實學旣盛，彼自絀矣。

仁宗皇慶二年十月，中書省臣奏科舉事。自隋唐以來，取人專尚詞賦，故士習浮華。今臣等所擬將律賦省題詩小義，皆不用。專立德行明經科，以此取士，庶可得人。帝然之。十一月，乃命中書參酌古今，定其條制。其以皇慶三年八月天下州郡縣舉其賢者能者，克試有司。次年二月

會試京師

科場每三歲一次，開試舉人。從本貫官司於諸色戶內推舉年及二十五以上，鄉黨稱其孝悌，朋友服其信義，經明行修之士，結狀保舉以禮敦遣。

考試程式：蒙古色目人第一場經問五條，第二場策一道，漢人南人第一場明經經疑二問，經義一道，第二場古賦詔誥章表內科一道，第三場策一道，經史時務內出題。

蒙古色目人願試漢人南人科目，中選者加一等，注授蒙古色目人作一榜，漢人南人作一榜。第一名賜進士及第，從六品，第二名以下及第二甲皆正七品，第三甲以下皆正八品，兩榜並同。流官子孫廕敘並依舊制。願試中選者優陞一等，在官未入流品願試者聽。若中選之人已有九品以上資級，加一等注授。

鄉試八月二十日蒙古色目人試經問五條漢人南人明經經疑二
問經文一道二十三日蒙古色目人試策一道漢人南人古賦詔誥
章表內科一道二十六日漢人南人試策一道

會試省部依鄉試例於次年二月初一日試策一場初三日第二場
初五日第三場御試三月初七日前期奏委考試官二員監察御史
二員讀卷官二員殿廷考試每舉子一名怯薛及一人看守時試策
漢人南
人蒙古色目
人各有限字

試卷不考格 犯御名廟諱及文理紕繆塗註一十五字以上者不
考謄錄所承受試卷並用朱書謄錄正文實計塗註幾字數標寫對
讀無差將來卷逐旋送考試所如朱卷有塗註乙字亦皆標寫字數
謄錄官書押候考校合格中選人數已定抄錄字號索上元卷請監
試官知貢舉官同試官對號開拆

延祐二年用趙孟頫元明善所議貢試之法凡蒙古由科舉出身者
從六品色目漢人遞降一級歲貢八人上四人克部令史下四人各路
教授

王氏曰按史稱仁宗皇慶二年初詔行科舉至是延祐二年三月
始開科取士分進士為左右榜蒙古色目人為右漢人南人為左
先是至元乙酉三月乙亥太史奏文昌星明文運將興時世祖幸
上都明日丙子帝生於儒州是夜張起巖亦生及帝之即位始設
科以取士而起巖遂為第一論者以為非偶然也

胡粹中曰貢試之法蒙古色目與漢人遞降品級已非公論教授
一郡之師表也而居部令史下則大非崇儒重教之意矣蓋教授
轉陞之難部令史遷擢之易故以此立法恬于進取者幾何人哉
文宗至順元年詔國子生積分及等者省臺集賢院奎章閣官同考試

官中式者以等第試官不中者復學肄業

泰定帝泰定四年勅國子監歲貢生員業成者六人

順帝至元元年二月詔罷科舉初徹里帖木兒平章江浙會行科舉驛請試官供張甚盛心頗不平及入中書首罷之叅政許有壬力爭伯顏心然其言而議已定不可中輟遂罷之時有王雖力諫而竟爲伯顏傳命人有過橋折橋之議

胡粹中曰古之人君患不能知賢才而用之以治天下故設科取士使懷才抱德敦行者由之以進若漢之鄉舉里選察廉對策非一途也然人之德行難知藝能易見德行者多自晦藝能者每自衒于是乎聽其所言以察其所蘊卽其所習以審其所向故唐之明經進士宋之制策詞學非一科也猶以爲有德者必有言有言者不必有德則又卽其言以攷其實若稽諸古典而本於經不失

乎先聖之旨則有取焉非但取其言語之工文藻之華而已也元之用人大抵偏于國族勲舊貴游子弟故選舉之法久而未行仁宗決意行之由此中華縫掖之士僅得拔什一于千百若謂科舉遺賢才則可謂妨選法則非也彼疾其供張之盛而請罷科舉者真悻悻然小丈夫哉

初天曆二年策士時大廷阿榮爲奎章閣大學士語其僚虞集曰更一科後科舉當輟輟兩科而復則人才大出榮不及見之矣公猶及見集曰得士之多幸如初言今文治方興未必有中輟之理榮歎曰數當然耳至是果如其言

明朝凡舉用人才俱隸禮部凡有司起送至者咨發吏部聽用以後徑送吏部而禮部所掌惟鄉會考試廷試及歲貢生員初進

國初舉保孝廉人才秀才及山林隱逸本部卽行所屬委各正官選求

續文獻通考卷之九
三
民間果係各實相副素無過犯之人有司起送到部咨發吏部聽用洪
宣以後純用科目之士而貢例吏員相間選用然為資格所拘無復顯
擢

歲貢沿革

凡歲貢生員到部本部奏開送翰林院考試如果中式者送國子監讀
書其入學五年以上及二次不中者發克吏典提調官吏及教官訓導
照例決罰洪武十六年奏准天下府州縣學自明年為始歲貢生員各
一人俱限正月至京從翰林院試經義四書義各一道判語一條中式
者發國子監不中者罰克吏十八年令歲貢不中式者遣復學肄業
提調官吏論以貢舉非其人律教官訓導罰俸一年貢不如期者以違
制論一十一年令歲貢府學一年州學二年縣學三年各貢一人必
性資純厚學業有成年二十以上者方許二十四年奏准歲貢不中

者有司官任及三年者照例論罪學官無分久近照例責罰生員食廩
五年者克吏不及者復學次年復不中者雖未及五年亦克吏二十
六年令四川土官衙門歲貢生員免考送監
永樂元年令生員有成材者不拘常例從便舉貢如十年之上學業無
成者就准本處克吏

正統七年令歲貢精選端重有文及通書筆者起送

天順中令歲貢生員取考科貢開除廩米月日准作食糧之數其餘俱
作虛曠若同案食糧則以籍各先後為次仍將試過考卷粘連批文親
齋赴部

成化四年令歲貢生員丁憂正服月日准作實數其養病侍親及妻孥
不復學皆作虛曠

弘治十四年令今後各處送到歲貢生員願授教職者雖係南監人數

亦送北監坐監一年本監按季考試能通三場文字委係家貧親老者方許告送吏部嚴加考試中者方送廷試取中選用不中仍送回本監肄業本部仍行提學官今後務嚴考貢之法不許姑息起送
條例

永樂二十二年十月禮部引歲貢生奏送翰林院考試仁宗召楊士奇等諭曰百姓不得蒙福者由守令守令匪人由學校失教歲貢中有不通政事不明道理者此豈可授官自今嚴考試之法不在文詞之工拙但取有理致者取之嚴則不學者不復萌僥倖之望而有嚮進之志矣弘治十七年三月南國子祭酒章懋疏奏洪武永樂年間在太學生徒動數千計其人類多英俊而教育之法至爲周詳計日以通經積分以出仕布列庶位得人爲多爰及近年生徒漸少計今本監見在之數科貢兩行共止六百餘人其歲貢一行非無可與共學之資而衰邁不振

者十常八九蓋由積累歲月挨次而升故也誨誘雖勤不無扞格其舉人一行節該南京禮部劄付開送新舊舉人共該六七百人又多不肯前來坐監罰雖嚴於違限彼亦視爲泛常近年有增貢之舉而所拔亦挨次之人資格所拘英才多滯乞於常貢外令提學憲臣於人才素多去處行選貢之法不分廩膳增廣生員通行精加考選務求行著鄉閭學通經術年富力強累試優等者乃以克貢或三年或五年量在監人材多少間一行之如此則生徒之數可以漸及往年且多精銳可進之資不貽因循自誤之悔也命下所司議行

嘉靖六年七月禮部尚書吳一鵬覆直隸河間府景州東光縣訓導金廷桂奏引舉人教職得應會試例及比雜職吏胥咸得與試至於師儒之官獨無科目之望合候命各處提學官將歲貢出身教職候鄉舉開科之年嚴加考試就本處生員一同起送應試其中中式者赴會試下第

仍復舊任則歲貢正途亦可與諸色役人兼收而聖朝無棄物在野無遺賢矣上悉允行歲貢教官得與鄉試自此始

四十五年十二月壬子穆宗卽位詔開朝廷用人惟求任當其才若拘泥資格使舉人絕望於九卿歲貢不得爲方面殊非飭吏治作士風之意今後吏部用人毋拘三途但其才能卓異者卽便破格擢用以示激勸

萬曆三年題准各處歲貢生員照依食糧前後選取六人送考提學官擇其最優者起貢其年力衰邁者卽授以儒官不准起送

十一年題准各府州縣遇歲貢之年止用一正一陪送考擇其頗優者一人克貢赴部

王氏曰按國初歲貢多入翰林爲卿佐勲名赫奕世宗以前皆重首貢陪試者一人每遇大典恩例則有恩貢後用言者議增用陪

試三人尋加至五人今則遵行新例掄校之嚴近於選貢矣萬曆

二十三年用言官議輪年輪省選貢頗失祖宗之舊至二十六年仍復首貢

鄉試沿革

洪武三年詔開科舉以今年八月爲始使中外文臣皆由科舉而選初場經義二道四書義一道第二場論一道第三場策一道中式者後十日復以騎射書筭律五事試之四年詔各行省連試三年庶官足任使自後三年一舉著爲定例又令科舉凡詞理平順者皆預選列惟吏胥心術已壞不許應試六年諭中書省臣科舉暫且停罷別令有司察舉賢才必以德行爲本文藝次之

十七年頒行科舉成式

凡三年大比子午卯酉年鄉試辰戌丑未年會試八月初九日第一

場試四書義三道每道二百字以上經義四道每道三百字以上未能者許各減一道四書義主朱子集註經義易主程朱傳義書主蔡氏傳及古註疏詩主朱子集傳春秋主左氏公羊穀梁胡氏張洽傳禮記主古註疏後四書五經主大全十二日第二場試論一道三百字以上判語五條詔誥表內科一道十五日第三場試經史時務策五道未能者許減二道俱三百字以上考試官皆訪明經公正之士於儒官儒士內選用

二十四年定文字格式

一凡出題或經或史所問須要含蓄不顯使答者自詳問意以觀才識

一凡對策須參詳題意明白對答如問錢糧卽言錢糧如問水利卽言水利就得孰失務在典實不許敷衍繁文

一凡作四書經義破承之下便入大講不許重寫官題

又令科舉歲貢於大誥內出題或策論判語參試之

永樂十五年北京行部及應天府鄉試考試官命翰林院春坊官主考賜宴於本部及本府

洪熙元年定取士額數

正統二年令開科不拘額數

景泰元年令在京在外鄉試同考試官五經許用五員專經考試

天順二年令兩京天文生陰陽生及官生子弟許就在京鄉試

弘治四年令各處提學官平日巡歷地方將教官考定等第以備科舉聘取

嘉靖六年春張璁上言近來各省鄉試權歸簾外官多通關節宜用京官臨時點差往典試事其在兩京亦用科甲出身官分考下禮部覆議

以聰言爲是命從之。

隆慶五年六月掌吏部事高拱言國初進士舉人並用其以舉人躋八座稱各臣者甚衆乃後進士偏重而舉人甚輕至於今極矣故舉人年才稍強輒遷延以俸一第必至衰邁始勉就官間有一二壯年出仕者則又爲貧之故志溫飽者也如是而冀治理胡可得哉臣以爲欲興治道宜破拘攣之見以開功名之路凡舉人就選初以資格受官之後則惟其政績而不必問其出身吏部自行體訪苟係賢能一體陞取若果才德出衆一體陞爲京堂卽至部卿無不可者舉人謁選又必稽其年貌五十以上授以雜職不得爲州縣之長蓋恐煩鉅之任非衰劣者所堪如此則吏治可興而化理有賴奉旨如議舉行

萬曆五年題准各房閱卷凡士子文字合式者除正卷外悉將備卷每房少或六七卷多則十餘卷批詳次序開列數目一併查對姓名籍貫付禮部提調司官以次填入副榜不必拘定額數

十三年題准程式文字就將士子中式試卷純正典實者依制刊刻不許主司代作其後場有學問該博卽前場稍未純亦許甄錄中間字句不甚妥當者不妨稍爲修飾但不許增損過多致掩本文

會試沿革

洪武十七年頒行科舉成式凡鄉試中式舉人出給公據官爲應付廩給脚力赴禮部印卷會試就將鄉試文字咨繳本部照驗以鄉試之次年二月初九日十二日十五日爲三場舉人不拘額數考試官本部敦請主文考試官二員同考試官八員提調官本部官一員餘同在京鄉試

三十年令再試寄監下第舉人中式者次其等第除教授教諭訓導不中者爲州吏目

洪熙元年奏准會試取士臨期請旨不過百名南卷取十之六北卷取十之四後復以百名為率南北各退五名為中卷

景泰元年令會試受卷彌封謄錄對讀等官於吏部聽選官取用

四年奏准會試考官翰林春坊專其事京官由科第有學行者兼取以克教官不許

天順八年令教官由舉人署職任滿該陞年四十以下願會試者聽

科目條例

丁未吳元年定文武科取士之法

洪武三年五月詔設科取士條格

景泰元年八月翰林侍講學士劉鉉主考順天府鄉試及揭曉第一人

劉宣乃盧龍軍士也同事者欲更之鉉爭曰朝廷立賢無方不可乃止

時論避之

弘治十四年七月掌國子監禮部右侍郎謝鐸言重科貢以清入仕之

路謂各省考官皆御史方面之所辟召職分既卑權衡無預以外簾之

官而專去取關節相通人圖倖進必差京朝官二員以為主考庶幾革

弊而真才可得疏入下所司知之

王氏曰按洪武辛亥有進士永樂癸未無進士天順癸未亦然永

樂初即位天順南省火皆以明年甲申會試永樂己丑長陵北征

又明年殿試故有辛卯進士正德庚辰康陵南巡明年世宗即位

故有辛巳進士我朝二百六十年癸未惟一舉

乙榜舉人

洪武三十年三月令禮部乙榜舉人署教諭訓導年未三十不願署教者聽

王氏曰按永樂四年傳臚之明日進所選副榜士臨策之擢周翰

等三人進學翰林餘俱赴吏部除學官宣德間副榜舉人得冠帶讀書太學遂循此制至正統後副榜始不復廷試矣

殿試沿革

國初凡士之舉於禮部者以三月朔日御殿而親試之謂之殿試後率以三月十五日間以他事更日

王氏曰宋制大臣或有不由科第者特賜于某人榜出身或用累

舉恩賜第國朝無之唯永樂間曲阜孔誥以舉人至京中副榜第

一人係宣聖後皇太子召見特賜進士出身授左春坊左中允侍

講讀後又有鄉試不第而特許會試者景泰中陳瑛王倫也大學士

子文有會試不第而特許廷試者洪武中韓克忠等一榜進士也曹

文襄彙以太和典史運糧至京乞會試得第二人廷試復為第一

人不十年遂登相位後有刑部吏南昱松陵驛丞鄭溫然位不甚

顯考蘇州志常熟黃鉞叔揚亦以典史中會試

洪武三十年六月上御奉天殿策試復取下第舉人先是禮部會試中式者少而北士被黜落者咸言取士不公上閱所取多南士亦疑之乃詔考官劉三吾及陳郊等一甲三人皆下獄命翰林院儒臣重閱落卷得文理優長者六十一人皆山東山西北平河南陝西四川之士至是復廷試之賜韓克忠等進士及第出身有差三月廷試已取陳郊為第一至是再試故當時有春榜夏榜之說

宣德五年三月上御奉天門策會試中式舉人上臨軒發策畢退御武英殿謂翰林儒臣曰朕於取士不尚虛文欲得忠鯁之士為用其間有若劉蕡蘇轍輩能直言抗論庶幾所望朕當顯庸之於是賦策士歌以示諸讀卷官云

按讀卷官國初用祭酒修撰等官洪武初國子祭酒魏觀太常博士

孫吳與給事中李顏修撰王俱四人克讀卷正統中猶與其事其後非執政大臣不得與而去取之柄則在內閣國初于殿試之明日卽傳臚揭榜今制約以三日內閱卷庶得盡心鑑別凡殿試讀卷官內閣大學士學士等官內具其名送該部奏請至日與各衙門該讀卷官詳定試卷次日同赴文華殿內各官將第一甲三卷以次進讀俟御筆批定出將二甲三甲姓名填寫黃榜

恩榮宴所洪武時無考永樂九年宴於會同館十三年宴於留守行後軍都督府立石宣德五年宴于行在中軍都督府宣德八年始賜宴于禮部遂爲例

復試下第舉人

洪武三年上御奉天殿策試下第舉人先是禮部會試者多而中式者少被黜落者咸以爲言上命翰林儒臣考下第卷中擇文理優長者復試下第舉人

十六人由是復廷試之永樂二年六月上命禮部曰會試下第舉人既多其中必尚有可取者令翰林院出題更試擇文詞優等者以聞遂得貢士張鉉等六十人以奏

選士教禁中

洪武六年詔天下鄉貢舉人罷會試開文華堂于禁中選舉人年少質美者肄業其中

選進士就學文淵閣

永樂三年正月命學士解縉等選新進士才識英敏者俾就文淵閣進學于是縉等選修撰曾棨編修周述周孟簡庶吉士楊相劉子欽彭汝器王英王直余鼎章敞王訓柴廣敬王道熊直陳敬宗沈升洪順章朴余學夔羅汝敬盧翰湯流李時勉段民倪維哲袁添祿雷紳楊勉儿二

續文獻通考卷之九
十八人以應二十八宿時庶吉士周忱自陳年少願進學上喜曰此有志之士也命增忱爲二十九人遂命司禮監給紙筆墨光祿給朝暮膳禮部月給膏燭工部擇近第宅居之仍命解縉領其事上或時至館中程試課業或召至便殿問以經史諸子故實且搜奇書僻事以驗所學每五日一休沐使內臣隨之校尉備騶從人莫不歆其榮

孝廉

宋寧宗嘉定八年詔大郡歲舉廉吏二人小郡一人
理宗寶慶元年詔侍從給舍臺諫卿監郎官及在外諸路帥臣監司各舉廉吏三人

真德秀謝獎廉吏奏劄曰臣今月十六日伏准尚書省劄子八月十五日三省同奉御筆近真某奏事朕因訪問廉吏某以知袁州趙鉞夫對朕惟獎廉所以律貪亦庶幾化貪爲廉之效以惠吾民趙鉞夫

可階直秘閣與監司差遣劄送臣者伏念臣比叨召札入對便殿具陳生靈耗斁之由皆本州縣貪殘之故淵衷有惻天語載詢欲知廉吏之姓名以備聖明之采擇念頃過宜春之境嘗聆守土之賢百口自隨惟祿是仰一介弗取其節可稱遂以所聞冒陳于上退而竊省尚有當言若崔與之帥成都但載歸艤之圖籍楊長孺守長樂罔侵公帑之圭銖皆最爲當世所推乃不能悉數以對方重愚臣之休惕忽傳宸筆之褒敷當九重勵精思治之秋正四方視儀聽唱之日一守臣之蒙擢殆若細微百執事之向風孰不興起祇承命告倍切忻愉汗吏革心實關公道瞽言獲用豈曰私榮願承明詔之作新更廣宸聰而咨訪循良未舉盍宏封密之規貪濁當懲可廢烹阿之典乃若澄源而正本尤先昭德以塞違使清光之化首倡於朝廷而廉耻之俗交興於中外庶幾民生日厚邦本弗搖此下臣獻替之微忠抑

初政施行之急務敢因奉謝僭有敷陳伏乞睿察

紹定二年臣寮奏乞歲舉廉吏申嚴保任之法如犯奸贓與之同罪仍令監司郡守覺察從之

金世宗大定三年命舉到廉能官第一等進官一階陞一等其次約量注授汚濫官第一等殿三年降二等次二年又次一年皆降一等詔問猛安謀克廉能者第一等遷兩官其次遷一官汚濫者決杖罷去擇其兄弟代之第二等杖八十第三等杖七十皆令復職

元成宗大德九年詔孝子順孫堪從政者量才任之

明洪武中布衣李德成以孝子舉為光祿寺署丞李希明浙江東陽人洪武丙子舉孝廉建文四年以江西叅政攝刑部尚書事劉敏直隸肅寧人洪武初舉孝廉十三年任刑部右侍郎十四年出為徽州同知麥志德廣東連山人姓嚴洪武初年以孝弟力田舉十七年任工

部尚書十八年坐累伏法鄭沂浙江浦江人洪武中舉孝行三十年拜禮部尚書三十一年致仕

永樂八年總旗張法保封肝療祖母旌擢如張信例武寧人張仲賢封肝療祖母旌如張法保例擢鴻臚寺司儀署丞又權謹徐州人永樂中舉孝行洪熙元年拜文華殿大學士本年改通政司右叅議致仕

武舉

宋寧宗嘉定五年詔諸路總領官歲舉可為將帥者二三人安撫提刑舉可備將材者各二人

遼聖宗統和三年七月北皮室詳穩進勇敢士七人十二年十一月詔諸道軍有勇健者具以名聞

金武舉始于皇統時至承安四年十一月許諸色人試武舉其判則詳于泰和式有上中下三等能挽乙石力弓以重七錢箭竹百七十步立

貼十箭內府試欲中一箭省試中二箭又遠射二百二十步梁三箭內
 中一箭至者又五十步內每五十步設高五寸長八寸卧鹿二能以七
 斗弓二大鑿頭鉄箭馳射府試則許射四反省試三反程試二反皆能
 中二箭者又百五十步內每三十步右左錯置高三尺木偶人戴五寸
 方板者四以槍馳刺府試則許馳三反省試二反程試三反左右各刺
 落一板者又依廕例問律一條又問孫吳事十條能說五者為上等若
 一有不中者皆黜之若射貼弓八斗遠射二百一十步射鹿弓六斗孫
 吳書十條通四為中等射貼弓七斗遠射二百五步射鹿弓五斗孫吳
 十條通三為下等解律刺板皆欲同前凡不知書者雖上等為中中則
 為下凡試中中下願再試者聽舊制就試上等不中不許再試中下等
 泰和元年定制不分舊等但從所願試中則以三等為次二年省奏武
 舉程式當與進士同時今年八月府試欲隨路設考試所臨期差官悉

以勅立未見應試人數遂權令各處就考之

宣宗貞祐三年武舉中者同進士例賜勅命章服時以隨處武舉入試
 者自非見居職及已用于軍前者令郡縣盡遣詣京師別為一軍以備
 緩急其被薦而未授官者亦量才任之

武舉鄉試條格

明制凡遇子午卯酉年十月武舉鄉試考驗日期并選取之法一例武
 舉會試例行各處起送應武舉之人務要詢訪素無過犯操行端謹言
 貌出眾膂力過人及考驗弓馬熟閑答策通曉兵法者各開明白方許
 以禮起送不許求足額數一槩濫舉

正德十四年六月該兵部題初場試馬上箭以三十五步為則二場試
 步下箭以八十步為則各要殼弓平矢直衝把子中央者為中如有創
 箭并中把子旗者俱不准三場試策一道兩京照先年團營武舉例兵



部官出題在外俱巡按御史出題其策問或據古兵法或問時務惟在
簡要含蓄以觀其才識不必專據紙上陳言徒取記誦致遺真才內有
先年已曾起送赴部會考不中之人今次又來會試許一體考驗起送
嘉靖三十年十月兵部覆湖廣襄陽等衛武舉官生許獻中等奏曾經
三次鄉試中式官生逐一查明登記在官開科之年查照文舉會試事
理不拘官舍軍民免其再試一體赴京會試若非三科以上者軍衛有
司不許朦朧起送永爲定規

隆慶二年六月兵部覆提督四口館太常寺少卿武金奏竊照武科規
制定自先朝別立科名似難輕擬但本官所論于兼收并蓄之中寓隨
材器使之術不爲無見相應酌議除武舉仍遵照舊規外合候命下自
今年爲始但有智通兵機或力勝二百斤以上或善射或善鎗或善刀
弩或善火器等項藝能之人每年通以春季爲期不必拘定名數許令

自投到官州縣官取其里老甘結嚴加考校申送該府府守驗中方許
呈送巡按御史選中量授衣巾克爲武生候至開科年分照舊隨武舉
入場外其餘俱候武舉場事畢日御史公同考試將智勇俱優者列爲
一等精通一藝者定爲二等各照武舉優待其最劣者發回原籍當差
取中之人行令該府量資盤費給文起送到部本部于會試之年照例
于武舉場事畢日將送到武生公同監試御史通行考驗其不中者發
回肄業中者不必分等止將爲首一人量給冠帶咨送薊鎮軍門克爲
各色把總領軍教練餘俱分發京營并各邊立爲教師名色卽克隊長
教練各軍俱許隨軍食糧差操三年之間獲有功次挨陞職級
武舉會試條格

嘉靖元年兵部等衙門會議每遇文舉鄉試之年行移天下招諭各色
人等堪應武舉者俱從巡按御史於該年十月考試兩京武學於兵部

月考優等選取俱送兵部會數於次年夏四月開科初九日初場較騎射十二日二場較步射十五日三場試策二道論一道先期請命翰林院官二員爲考試官給事中并部屬官四員爲同考試官取中名數臨期請自上裁試畢一應有事場屋官員并中式之人照文舉事例梓其姓名錄其弓馬策論之優者裝潢成帙題曰武舉錄進呈睿覽二十九年本部再議覆奉欽依合照歷科舊規仍以邊方腹裏分定則例邊方取三分腹裏取二分三十二年本部題奉欽依應試官生曾經三次鄉試中式者查照文舉會試事例不拘官舍軍民免其再試

薦舉

宋理宗寶慶元年詔舉賢良之士淳祐十年詔舉制科景定二年詔禮部國子監以有出身人附銓試場應詞學科照嘉熙二年例行之度宗咸淳二年太傅陳壽孫乞太學增試宏詞科是時王應麟應鳳

與選

按浙江通志杭州錢易錢彥遠紹興夏噩錢宇之温州王景山陳之何勝實劉天益則以賢良方正直言極諫舉杭州錢明逸錢藻李尚則以才識兼茂明于體用舉杭州李鞬温州王邵薛嘉言謝任龜軻陳龜朋陳峴處州王大方湯思退則以宏詞舉杭州陸邵之紹興王俊則以詞學兼茂舉寧波王璧王應麟王應鳳紹興石慶許蒼舒邢宜莫叔光岑全章一新錢揚祖徐執台州趙澣金華許存禮徐淵則以博學宏詞舉紹興胡太初孫爍岑賢孫則以詞學舉寧波繆師臯處州葉誕王信鄭汝諧項安世劉澹然則以教官舉湖州沈友直劉嶠周剔温州仰忻丁廉夫張輝方燧蔡元康潘安固朱敏切處州祝頰則以入行舉紹興張子俊張玘陳仲淳沈信年張遜王蘭韓啓呂諒呂璠温州孔夢斗陳中庸萬規處州徐仲吳銘則以經明行修

舉朱黻胡混王弘顧臨金華鄭祥徐佺趙崇俊應孟堅甘霖陳夢睿徐鉅則以明經舉而童子科又在外

遼道宗咸雍六年設賢良科詔應是科者先以所業十萬言進 十年六月御永安殿策賢良

金章宗大定二十九年上封事者乞鄉以入行貢春官設制舉宏詞科戶部尚書鄧儼等謂成周鄉舉里選法卒不可復設科取士各隨其時入行者乃亡宋取周禮之六行孝友睦婣任恤加之中為八也凡人之行莫大于孝廉今已有舉孝廉之法及民有才能德行者令縣官薦之又制犯十惡奸盜者不得應試亦六德六行之遺意也夫制舉宏詞蓋天子待非常之士若設此科不限進士并選人試之中選擢之臺閣則人自勉矣上從其議 明昌元年三月初設應制宏詞科 二年設制舉有賢良方正能直言極諫博學宏詞達于從政等科試無常期

試則先投所業策論三十道于學士院視其詞理優者委官以群經子史內出題一日試論三道如可則廷試策一道不拘常務取其無不貫者優等遷擢之宏詞科試詔誥章表露布檄書則皆用四六誠諭頌箴銘序記則或依古今體或參用四六 承安二年三月始定保舉德行才能格 泰和元年上謂德行才能非進士科所能盡可通行保舉之制

元世祖至元十八年詔求山林隱逸之士 二十三年遣侍御史程文海訪求江南遺才 二十八年復詔求隱晦之士俾有司具以名聞時徵劉因為集賢學士辭不至因字夢吉容城人前徵為右贊善大夫尋辭歸至此復徵之因以疾固辭帝聞之曰古有所謂不召之臣其斯人之謂歟遂不强致之

胡粹中曰劉因風節與嚴光相似然子陵羊裘釣水過為殊絕之

行加足帝腹又失人臣之禮峻厲峭直不可以爲法而靜修聞命
卽拜受任則辭進不失義退不違禮卑不可踰高不過抗從容自
然得賢人之高致者也尚論元世遺逸靜修一人而已

成宗大德八年五月徵蕭軒赴闕命有司給以安車

英宗至治三年拜住言前集賢侍講學士趙居信直學士吳澄皆有德
老儒請徵用之帝喜曰卿言適副朕心更當搜訪山林隱逸之士遂以
居信爲翰林學士承旨澄爲學士

順帝至正三年徵處士脫因伯顏張瑾杜本惟本不至本在武宗時常
被召至京師卽歸隱武夷山下文宗聞其名徵之不起至是脫脫薦之
召爲翰林侍制兼國史院編修官使者趣至杭州稱疾固辭且致書示
相曰以萬事合爲一理以萬民合爲一心以千載合爲一日以四海
爲一家則可以言制禮作樂而躋帝王之盛矣

許約曰科舉之法實始于隋唐後世因之而科舉益盛然科舉與辟
舉之法並行故唐之人才爲盛然房杜裴郭諸公未必盡出于科目
也宋起孫明復于泰山而處之胄監拔蘇洵于眉山而進之容臺擢
程頤于西洛而寘之講筵所以尊尚有德自足以聳動天下而人才
之盛職此之由若罷薦舉獨行科舉之法命有司以防奸欺設邏卒
以檢懷挾功名之士不拘小節固不以爲嫌彼恬退高蹈之士必不
屑就大抵科目固足以得士亦豈能盡得天下之賢中人以下之資
可以利誘若學際天人道全體用者安肯決榮辱于三場競是非于
寸晷哉當于科目之外別立薦舉之法若學行兼備肥遯林泉不求
聞達不屑科目者聽所在保舉待以不次夫如是不徒有以獎拔恬
退而野無遺賢之美溢於唐虞矣

明初令有司保舉人材卽古鄉舉里選之遺意累朝下詔亦必及之

續文獻通考卷之九
洪武庚子六月遣使徵宋濂劉基章溢葉琛至金陵帝問陶安曰四人者何如安曰皆臣所不及也帝嘉其善讓

元年九月詔起懷才抱德隱于巖穴之士遣夏原吉詹同魏觀吳輔趙壽等分行天下訪求賢才

六年五月命禮部訪求賢士於天下

是年罷科舉專用辟薦其目有明經行修有懷才抱德有賢良方正有人材有孝廉鄉舉于朝而各省貢士皆卒業太學以次除用蓋罷進士之科者十有餘年時既不喜文士又以初立辟薦法行之甚嚴每舉者至京上親校閱不稱肯輒坐舉主往往有謫戍者至洪武十五年復開科

十三年二月詔舉聰明正直孝弟力田賢良方正文學術數之士

十七年令各布政司直隸府州縣舉秀才人材必由鄉舉里選知州知

縣等官會同境內耆宿長者訪求德行聲名著于州里之人先從鄰里保舉有司再驗言貌書判方許進呈若不行公同精選者坐以重罪

十九年七月詔舉經明行修練達時務之士年七十以上者郡縣禮送京師上諭禮部郎中鄭居貞曰古之老者雖不任以政至於咨詢謀謨則老者閱歷多而見聞廣達於事情周於物理有可資者居貞對曰人至六十精力衰耗則不能勝事請六十以上者不遣上曰正爲此來有司不體朕意士有耆年便置不問豈知老成古人所重文王用呂尚而興穆公不聽蹇叔而敗伏生雖老猶足傳經豈可槩以耄而棄之也

王氏曰按太祖自立國時省臺要地俱以勳舊克之其所聘用如劉誠意宋文憲輩雖禮遇優崇而頗循資序自胡陳之後群臣鮮當意者洪網嚴密誅斥相繼而學士大夫亦多所引避於是不愛高爵越資以收天下之賢俊而有朝徒步暮金紫者永樂中亦聞

行之

永樂元年勅內外諸司文職官員各舉所知或堪重任而沉滯下僚或可剴繁而優游散地或抱道懷才隱居田里無問遠近並舉以聞

洪熙元年詔民間有行已廉正才堪撫字者許見任官具實舉薦

宣德七年詔各處有文學才行出眾之士自二十五歲以上令所在有司保舉赴京選用

八年詔各布政司按察司府州縣官連名舉保賢良方正一人起送吏部量才擢用

景泰三年詔各處見任官員果有才行政事優長拘於資格屈在下僚及有文學才行堪授職任之士隱於民間及官員罷職委無贓犯重情而才學可用者並聽薦舉赴京考用所舉之人後犯贓罪連坐舉主

大順元年詔處士中有學貫天人才堪經濟隱居高蹈不求聞達者

司具實奏聞

五年令天下有才兼文武或學行異等或謀勇出眾者許所在官司具實奏聞

成化十九年九月授吏部聽選舉人陳獻章爲翰林檢討獻章廣東新會人巡撫廣東都御史朱永等薦其學行可以追匹古人乞以禮徵聘吏部謂獻章乃聽選舉人非隱士比遂移文取至京欲考試職事獻章奏言臣以舊疾未平未能就試母年七十有九乞放歸侍養上特授以翰林檢討聽歸一時推尊之目爲道學

二十年三月徵處士胡居仁尋卒

弘治十年令府州縣正官保舉山林隱逸之士懷才抱德經明行修衆所推服者儒士潘辰以廷臣薦授翰林待詔歷官太常寺卿

嘉靖二年生員文徵明以巡撫薦八年儒士葉幼學以輔臣薦俱授

待詔

霍韜曰國初用人薦舉爲重貢舉次之科舉爲輕今則科舉爲重貢次之薦舉不行矣故有行同盜跖心劣商賈者能染翰爲文俱隸仕籍此風所以益偷也

國朝優禮處士其以禮自處者無過於陳靜誠遇吳康齋與弼武學士周文而已陳在高帝初應聘與參帷幄大計再授翰林院學士辭授禮部侍郎尚書左丞又辭竟以處士卒遣中官諭祭官爲賻葬有子枋以遇故特擢累官至尚書武在文廟初以藩邸講讀之舊驛召至京賜襲衣銀帶鞍馬以爲翰林侍講學士固辭聽以學士致仕賜勅及白金文幣酒餼馳驛歸吳在英廟時徵時石亨用事邀名飾過其門客謝昭做張鼎教蔡京招楊時故事勸以薦士亨從之因見李賢說山林隱士有撫州吳與弼者乃司業吳溥之子以學行

名天下亨慨然代爲草奏上之上召賢問曰吳與弼如何賢對曰與弼儒者之高蹈自古聖帝明王莫不好賢下士徵聘隱逸若陛下行此一事實本朝盛舉上遂命行人聘之越五月徵至京上謂李賢曰與弼當授以何職賢對曰今東宮講學宜授官僚次日召吏部命爲左諭德朝士皆驚以布衣召至一旦授此與弼疏辭上召入文華殿問曰特聘爾來何不就職與弼對以老疾上曰官僚亦優閒不必辭賜以文綺羊酒薪米命太監牛玉送至館務令就職與弼具疏固辭上復召入文華殿賜勅褒嘉賚以銀幣允其所辭與弼疏陳十事上命有司月給俸米以贍終身仍命行人送歸與弼復上表謝恩而去

任子

宋寧宗嘉定十四年夏四月命任子兼試於御史臺十五年二月罷御史臺兼試任子法

理宗淳祐二年勅令臣寮世賞不許奏異姓著爲令

遼太宗天顯二年十二月詔選遙輦氏九帳子弟可任官者

穆宗應曆五年四月命郎君蕭海黎世爲北府宰相

聖宗開泰入年十二月詔庶孽雖已爲良不得與世選

興宗重熙十六年二月詔世選官擇有才能者用

道宗清寧二年正月詔二女古部世預宰相節度使之選者免皮室軍

金熙宗天眷中門廕之制凡一品至八品皆不限所廕之人

世宗大定二年二月遣遼陽主簿石抹迭東京鞠院都監移刺葛補

招奚契丹叛人爲白彥敬紇石烈志寧所害詔收錄其子 四年五月

詔皇家袒免以上親就廕者依格引試中選者勿令當爆使 五年十

月制亡宋官當廕子孫者並同亡遼官用廕又曰教坊出身人若任流

內職者與文武同廕自餘有勤勞者賞賜而已 七年五月命司天台

官四品以上官改授文武資者並聽如太醫例廕

二十九年八月初定品官子孫試補令史格

元世祖中統二年九月邢州安撫使張耕告老詔以其子鵬翼代之

至元四年詔諸路官品正從分等職官用廕各止一名 諸用廕者以

嫡長子若嫡長子有廢疾立嫡長子之子孫曾玄同如無立嫡長子同

母弟曾玄同如無立繼室所生如無立次室所生如無立婢子如絕嗣

傍廕其親兄弟各及子孫如無則傍廕伯叔及其子孫 諸用廕者孫

降子曾孫降孫婢生子及傍廕者皆于合敘品從降一等

七年四月勅諸路達魯花赤子弟廕敘克散府諸州達魯花赤其散府

諸州子弟克諸縣達魯花赤諸縣子弟克巡檢又許衡致仕官其子師

可爲懷孟路總管以便侍養

成宗大德四年省議職官子孫廕敘正一品子正五品敘從一品子從

五品敘正二品子正六品敘從二品子從六品敘正三品子正七品敘從三品子從七品敘正四品子正八品敘從四品子從八品敘正五品子正九品敘從五品子從九品敘正六品流官於巡檢內用雜職於省劄錢穀官內用從六品子近上錢穀官正七品子酌中錢穀官從七品子近下錢穀官諸色目人比漢人優一等廕敘達魯花赤子孫與民官子孫一體廕敘傍廕照例降敘

英宗至治元年三月勅罷醫卜工匠任子其藝果精絕者擇用之陶安氏曰有虞世賞岐周世祿獨不世官者人賢否殊也逮至周官師氏以禮樂德行掌國子之教然猶考藝進退未嘗悉世其官而必任焉後世廕補法行或曰顯官必公卿子弟爲之以幼習其業熟朝廷臺閣之儀或曰驕驕不通古今無益于民宜明選求賢除任子之令是皆偏見耳及攷漢儀二千石以上得任子弟擇茂廉者補令

其法良而未備今制廕補五品之上受命於朝降自六品省銓掌金穀且第其上中下以歲月爲差至滿始受朝命許典民政蓋治民者爲國之大端理財者經國之要務將俾因仕知學練世故涉艱難以培其才然後移以治民故不得不自理財始此則古所無也

明廕敘之例其用廕以嫡長子若嫡長等殘廢則嫡長子孫以逮曾孫玄孫無則嫡長之同母弟以逮曾玄又無繼室及諸室及諸妾所生者旁廕其親兄弟子孫又無旁廕廕伯叔子孫

品官子弟入廕事例

古太學之教自天子之子公卿大夫至元士之適子皆得入國初文武官一品至七品之子皆得克國子亦有及于七品之下者蓋古世祿之義也當是時啓教雖弘而任官不易非強學登科則積分恒至十餘載而後使之歷事乃授之官卽皆中材其儆淬若是之久鮮不達已其後

貢舉諸生卽顯盛貴游之家乃不得輒祿宣德以來時有陳乞惟上所
裁恒必驗其材質試其文理之可教者而後許之仍令勉學務從科舉
出身正統中有得請入監而屢科不第其齒已長者祭酒以爲言英宗
命入監十年以上准照歷事出身卽科舉中式者會試下第仍須復監
循次歷事出身天順元年禮部復議在京三品以上官之子奏願入監
讀書者務從科目出身不許歷事上從其言且曰國學乃育材之地今
後不許濫進自是非三品子孫不得陳請矣成化初令大臣三品以上
子孫許一人送監照監例出身隨又令官非年久有政聲者不許十八
年禮部奏准在京三品以上官政績顯著者廕一子入監必先試能通
經書大義者乃許弘治以來凡京官三品以上已經考滿已給誥命者
許一子廕敘免考送監惟未及一考并有過劾退及年遠雜流出身者
乃不許其廕子子未仕物故許其補廕無子者許廕繼嗣之子若應

廕子恩典而死許其子孫自陳其間亦有有子而願廕其侄者嘉靖十
二年十五年以皇子生十八年以立東宮恩詔兩京文職三品以上官
未及三年考滿者廕一子入監讀書

國初時品官之子必試其人而後得廕廕必從科舉而後授官近歲以
來廕而獲舉復得以其次子補焉或以嫡子之子有補敘至曾玄者胄
子雖由古義而賞延之典於是彌隆

宣德中大理寺卿湯宗子沐故太常寺寺丞孔克準子希經俱乞恩入
監讀書從之

正統二年九月翰林院檢討仍管助教事王仙會子旒始乞恩得入監
讀書惟令科第出身初行在兵部員外郎俞英子端太醫院醫士王文
子謙俱乞恩得入監至是旒援以爲請上命行在禮部尚書胡濙試旒
文字濙以文理平順奏聞遂許之

弘治十年二月都察院右都御史黃紱子桓乞恩補廕從之先是南京刑部尚書周瑄兵部尚書原傑俱有子入監天歿以其孫周伊原應韶補桓兄杞在歷未及選用而死比二人例遂得入監

正德十五年六月廕大理寺卿陳恪子應期入監讀書恪未經三年考滿蓋異數也

嘉靖四年閏十二月故翰林侍講贈學士劉球立孫劉弘溥奏稱父劉祚係劉球曾孫球因直言構禍至弘治十六年伊弟劉祠陳乞已授通政司經歷司知事先臣父劉祚奏乞再廕武宗准送監讀書嘉靖四年父劉祚中順天鄉試尚未實授恩廕今查得正德八年聖旨先由錄廕後中科目的還許補廕一人入監相應照例補廕奉旨劉弘溥准補廕送監讀書

三十一年六月已故新建伯王守仁繼妻張氏奏稱臣夫歷任右副都

御史至陞南京兵部尚書中間歷俸三年有餘累獲邊功彼時軍事倥傯未敢給由及地方平定觸冒瘴氣隨即病故遺下三歲孤兒王正億今長成陳乞比例廕予從之

太學特廕事例

洪武以來品官子弟之外間有特廕若湖廣行省參政吳雲之子載錄爲國子生以雲死事滇南也

內閣經筵及儲闈輔導祖宗以來屢有加廕凡特廕者今皆曰恩生其各處生員有能擒斬首口許之入監則曰功生

廕官位高於父

國朝重科目一途任子多不得大位獨燕府左長史朱忠定公復以二品後五品終任子濬爲北京刑部尚書二品 禮部左侍郎儀文簡公智三品任子銘至太子太保兵部尚書一品 翰林院學士呂文懿公

原五品任子憲至南京太常寺卿三品。少詹事劉文恭公鉉四品任子盛至太常寺卿掌尚寶司三品。浙江按察司副使陶公成四品任子魯至廣東右布政使二品。南京工部右侍郎黃文毅公孔昭任子綰至禮部尚書兼翰林學士二品。江西按察司副使許忠節公達四品任子瑒至錦衣衛指揮使管衛事三品。右副都御史孫忠烈公燧三品任子堪至都督僉事二品堪任子鈺至都督同知一品品秩皆過於所自蓋奇遇也。儀銘累任翰林又以尚書掌府黃綰為詹事學士咸極清華之選而儀贈官至特進左柱國太師階勛位秩遂冠人臣陶復轉詹子孫至錦衣千戶世襲豈不尤奇哉。

詹子改官例

宣德中儀侍郎智子銘以詹為給事中後改翰林檢討進修撰再進侍讀金殿學幼孜子達以詹為檢討後改給事中轉左右至兵科都給事

中其改官可謂奇矣正德初許侍郎進入兵部子誥以給事中避言路改檢討與金達事又相反

登極加恩詹子例

世宗嘉靖元年楊少師廷和蔣少傅見毛少保紀費少保宏詹子世襲固辭不許然四公迄無拜。二年太監趙山死以從龍功詹養子為錦衣指揮

隆慶二年吏部奏原任左中允郭希顏以建言被刑乞詹子入監立中宮加恩例

神宗萬曆六年立中宮王氏加恩輔臣進秩詹子

按前中宮立無加恩故事蓋異典也

皇子生推恩內閣司禮詹

神宗萬曆十年皇第一子生下詔赦天下上慈聖徽號推恩慈聖父武

清伯李偉進封侯仁聖父固安伯陳景行加祿米廕子內閣進秩廕子
司禮監馮保廕弟侄

按皇子生例不推恩上徽號推恩止皇親而已此異典也

冊立加恩例

神宗萬曆三十年三月以冊立覃恩存問大學士申時行王錫爵王家
屏各遣人奏謝奉旨申承芳王明虞王湛初俱與做中書舍人
邊功加恩

武宗正德五年寧夏平加恩內閣

按邊功未有及內閣者有之自茲歲始

八年以山東河南賊平內閣大學士李東陽楊廷和梁儲費宏各廕子
嘉靖十九年陝西大捷詔復夏言特進光祿大夫上柱國少師太子太
師仍兼進吏部尚書華蓋殿大學士翟鑾加少保此則夏公以忤旨

秩急欲光復故也自是不已而議復河套希大封拜得罪死

三十年東閣大學士李本進禮部尚書而撰文尚書徐階加少保廕一
子入監公朱希忠加太子太師都督陸炳加太子太保尚書孫承恩加
太子少保此則替立例也

三十三年以拒口功輔臣嚴嵩廕子尚寶司丞徐階李本廕子中書舍
人而伯陶仲文增祿百石公朱希忠都督陸炳增祿五十石方承裕太
子太保亦贊立例也自是復不與邊功將二十年

隆慶四年冬十二月北口俺答執逆賊趙全等九人來獻總督宣大都
御史王崇古以聞詔全等伏誅有旨口執叛效順內外諸臣運謀宣力
功委可嘉王崇古加太子少保兵部尚書兼都察院左副都御史廕一
子錦衣衛正千戶世襲還賞銀五十兩大紅紵絲蟒衣一襲方逢時陞
兵部左侍郎兼右僉都御史廕一子錦衣衛百戶世襲賞銀三十兩大

紅飛魚紵絲一襲。郭乾加太子少保。廕一子入監讀書。賞銀三十兩。大紅紵絲二表裡已。而吏部奉聖諭獻俘。禮成內閣輔臣殫忠運謀勞績可嘉。茲特加恩。李春芳加吏部尚書。俸進中極殿大學士。餘官如故。高拱加少傅兼建極殿大學士。太子太傅尚書如故。各廕一子尚寶司司丞。殷士儻加少保武英殿大學士。太子太保尚書如故。并原任大學士趙貞吉俱廕一子中書舍人。

按全等中國人也。逃入口爲嚮導。後俺答有孫曰把都那弟爲我所獲。俺答日夜思復其孫。乃以全等送還之。遂遣回把都那弟云。異途加恩例。

金忠初名世忠。鄆縣人。精于卜。以奇驗聞于燕邸。召至問以靖難。卜云吉。遂署爲紀善侍帷幄。用其謀有成。後官兵部尚書。洪熙元年贈少師。謚忠襄。子達年十歲授檢討。還鄉。受俸以幼童廕官自此始。

蒯祥蘇州人。木工也。永樂中扈從往北。凡宮殿廟社皆從事。正統中重作三殿及文武諸衙門。勞尤多。天順末奉命作裕陵。歷太僕寺少卿。晉工部右侍郎。轉左。食一品俸。得贈及祖父母。廕其子爲錦衣衛千戶。又廕國子生。

徐杲揚州人。亦木工。嘉靖末脩玄教。屢興改宮殿。杲多著力。極膺榮寵。累官至工部尚書。又官其子爲錦衣衛百戶。

駙馬都尉齋孫入監讀書者。李琦孫慎尹。清孫衡沐。昕曾孫居皆乞恩。得旨。嗣後兩宮徵號詔赦內有錄用一條。不可勝紀。

翊聖夫人劉氏。男季通。天順八年送翰林院習字。授中書舍人。累陞太僕寺少卿。恭聖夫人男胡恭。成化二年送中書習字。授中書舍人。累陞尚寶司卿。

童科

金有經童之制。凡士庶子年十三以下，能誦二大經三小經，又誦論語諸子五千字以上，府試十五題，通十三以上，會試每場十五題，三場共通四十一以上，爲中選。所貴在幼，而誦多者，若年同，則以誦大經多者爲最。

熙宗皇統十五年，詔闕童子舉，取至百二十二人。

海陵天德時，以童子無益，詔廢之。

世宗大定二十九年

章宗初即位

上謂幸臣曰：經童豈遽無人，其議復置。

章宗明昌三年，平章政事完顏守貞言：經童之科，非古也。自唐諸表薦，或取五人，至十人，近代宋仁宗以爲無補，罷之。本朝皇統間，取及五十人，因以爲常。天德時復廢，聖主復置，取以百數，恐久積多，不勝銓擬乞論。旨約數取之。上曰：若所誦皆及格，何如？守貞曰：視最幼而誦不訛者，精選之，則數亦不多也。復問參知政事胥持國，對曰：所誦通否，易見。

豈容有濫？上曰：限以三十或四十人，若百人，皆通亦可，覆取其精者，持國曰：是科益資教之術耳。夫幼習其文，長玩其義，使之蒞政，人才出焉。如中選者，加之修習，進士舉業，則所記皆得爲用。臣謂可勿令遽登仕途，必習舉業而後官之可也。若能擢進士第，自同進士任川。如中府薦會試，視其次數優其等級，幾舉不得薦者，從本科出身，又可以激勸而後得人矣。詔議行之。

元舉童子，皆以其天資穎悟，超出兒輩，或能默誦經文書寫大字，或能綴緝辭章，解說經史，並令入國學教育之。惟成宗時，張秦山尤精篆籀。英宗時，陳元麟能通性理。泰定時，葉留畊問以四書大義，對曰：無過事父母，能竭其力，事君能致其身，特人以遠大期之。

幼科科目不設，童科間有以神童薦者，召至親試，或留中講讀，或遣歸就舉。洪鐘四歲善大書，李東陽五歲召試大書，屬對程敏政，八歲召試

聖節及瑞雪詩并經義

吏道

宋寧宗嘉定八年詔凡吏毋得減年參選著爲令

遼聖統和中耶律八哥以世業爲本部吏未幾陞開撒絨尋轉樞密院侍御終西北路都監

金制取吏員者有律科又稱諸科亦謂之進士其法以律令內出題府試十五題每五人取一人其制始見于海陵正隆元年至世宗大定二十年正月定試令史格二十二年定制會試每場十五題三場共通三十六條以上文理優擬斷常用字切者爲中選臨時約取之初無定數至章宗大定二十九年有司言律科止知讀律不知教化之源可使通治論語孟子以涵養其氣度遂令自今舉後復于論語孟子內試小義一道府會試別作一日引試命經義試官出題與本科通考從之

熙宗皇統八年定右職省令史譯史格考遷一重女直人依本法外諸人越進義每三十月各遷兩重百二十月出職除正六品以下正七品以上職官

海陵正隆二年更爲五十月遷一重初考女直人遷敦武校尉餘人遷保義校尉百五十月出職係正班與從七品若自樞密院六部轉省者以前已成考月數通算出職

世宗大定三年定格以七十五月出職者初上令二中令三下令四五錄事六下中令七上令八上令百五十月出職者初勅同運判州官等二三中令四上令回呈省

章宗明昌三年改提刑司令史爲書史

元世祖至元十九年省議中書省掾於樞密院御史臺令史內取臺院令史於六部令史內取六部令史以諸路歲貢人吏補充內外職官才

堪省掾及院臺部令史者亦許擢用省掾考滿資品既高責任亦重皆自歲貢中出若不教養銓試必致人才失真

時歲貢吏式各路司吏有關於所屬衙門人吏內選取委本路長官叅佐同儒學教授考試習行移筭術字畫謹嚴語言辯利詩書論孟內通一經者爲中式然後補克按察司書吏有關府州司吏內勾補至歲貢時本州本路以上再試貢解諸歲貢吏當該官司於見役人內公選以性行純謹儒吏兼通者爲上才識明敏吏事熟閑者次之

二十二年擬呈試吏員先有定立貢法

各道按察司上路總管府凡三年一貢儒吏各一人下路二年貢一人以次籍記

成宗元貞元年詔諸路有儒通吏專吏通經術性行修謹者各路薦舉廉訪司試選每道歲貢二人省臺委官立法考試必中程式方許錄用九年省判凡選府州教授年四十以下者願試吏員程式許補各部令史

仁宗延祐間下第之士恩例不可舉得間有試補書吏以登仕籍者文宗天曆元年詔廉訪司書吏當以職官教授吏員鄉貢進士參用陶安曰唐虞三代之世臯夔稷契伊傅周召渾然全才爲時輔佐道德勲業標準萬世未嘗有儒與吏之名也周官謂儒以道得民吏以治得民二者並立然猶相濟爲用秦不師古棄詩書事刀筆吏始抗儒而反勝焉漢之時習章句者爲儒攻法律者爲吏判爲兩途宋設經義治事齋人才之興駸駸逼古吏本于儒也審矣國朝混一治雖尚史世祖號稱儒教大宗師若此則崇儒尤重可知今職簿書佐官府者通謂之吏先朝詔旨若曰秀才生員願爲吏者裨爲之竊論秀

才爲文行英茂者言生員但廩食于學校者爾然擢吏恒于生員而名秀才者不得與似非明詔初意此亦吏弊不諳大體之一也

又曰朝廷以吏術治天下中土之才積功簿書有致位宰執者時人翕然尚吏雖門第之高華儒流之英雅皆樂趨焉其由儒入吏者歷四考始登于選部此爲吏之常調也有一拔陞清要可立致緋紫惟中土之才躋是者十八九方今天下分道二十有二各設風憲贊憲府刑政者曰書吏擇其才能以道揚威德去憲官最近

明初因前代之制令有司設司吏許各保貼書二名其後定設掾史令史書吏司吏典吏俱視政事繁簡爲額及政事益繁又設提控都史令史胥史獄典贊典事簡者則裁減之三考滿日冠帶回籍省祭銓部照年分捱次行取各查出身資格選用

吏役資格

洪武十七年奏定在外二品衙門通吏考滿於在京從七品出身吏員內陞轉令史於在京正八品出身吏員內陞轉在外三品衙門令史書吏於在京正九品出身吏員內陞轉在外三品衙門典史四品衙門司吏於在京從九品出身吏員內陞轉察院磨勘司典史仍依原定未入流品內出身五品以下衙門吏人依原定資格陞轉其在京一品二品衙門知印承差不許於吏員內取用

凡隨工隨邊當該辦事官吏嘉靖二十一年奏准在外納銀未經歷事之人不許撥送隨工隨邊再希減免又脫京考其應免考者止免初考不免歸選覆考

凡吏農援例嘉靖十一年題准在外吏農援例免其二考起送到部該辦事者不許重納在京辦事未滿并未撥當該者必查在外曾應兩考不係援例者方准送納

凡吏典辦事舊例俱以三年爲限。成化二十二年奏減半年。弘治四年又奏減三箇月。十一年又奏減三箇月。止辦二年。其兩考通吏舊例免辦事就撥當該十四年奏准辦事二年。若倉攢守支六年。鹽課司攢守支八年。亦俱免辦事。未及六年八年者。扣算補辦。全無守支者不免。其在南京辦事者原無定例。

考滿事例

洪武十七年議定吏員考滿試中第一第二等者。於在京有出身衙門內用。第三等者。於在京未有出身衙門內用。

凡三考役滿吏考其法律立爲三等。通者爲一等。依資格出身。其次爲二等。雜職出身不通者爲三等。給與冠帶。放回原籍閑住。

承差知印事例

洪武二十六年奏准在外承差於能幹人員內選取。三年考滿後內無

私過雜職內用有私過克吏役

正統元年奏准在外三司承差有缺於民間丁糧相應殷實之家。選其才貌可用者收叅。

掾吏顯擢姓名

滕懋德 張度 胡禎 徐輝 李友直 呂本 李信 徐晞 李質 郎本 中十人仕

至尚書 王鍾劉本道 陳寧 汪河 葉春 王春 劉敏 王詔 吳復 十人仕

至侍郎 樂韶鳳 任祭酒 楊時習 汪懋 任大理卿 張苗 任南京

通政使 太監張敏從子 郝郁 任光祿卿 余節 任御史中丞 黃政 任右

僉都御史 沈顛 任御史 况鍾 熊尚 賈信任 知府 平思 任叅政

萬祺 任序班 以祿命術奇驗 至尚書

資選

宋寧宗嘉定十年十二月募民納粟補官軍興故也。

遼道宗大安四年四月立入粟補官法。

金熙宗皇統三年三月陝西旱饑詔許富民入粟補官。

世宗大定元年以兵興歲歉下令聽民進納補官又募能濟饑民者視其人數爲補官格。

章宗承安五年正月尚書省言內外軍人入粟補官者多行伍寢虛請俟平定應監差者與三酬門戶有職事者陞一等其子弟應廕者罷之哀宗大興元年八月賣官及許賣進士第京城民楊興入貲授延州刺史劉仲溫入貲授許州刺史。

元世祖至元二十五年遙授松江民曹夢炎浙東宣慰副使夢炎願歲輸米萬石乞免他徭且求官職桑哥以爲請故有是命。

武宗至大元年江浙湖廣江西河南兩淮屬郡饑訪富家能以私粟賑貸者量以授官。

泰定帝泰定二年以郡縣饑募富民入粟拜官。

文宗天曆三年納粟補官者實授茶鹽流官如不願仕而襲封父母者聽。

凡先嘗入粟遙授虛名者今再入粟則依驗糧數照資品令實授茶鹽流官。

先嘗入粟實授茶鹽流官今再入粟則依驗所入糧數加等陞職。

順帝至正四年十月令民入粟補官以備賑濟有匿好事而輸粟得七品雜流者爲怨家所告有司議輸粟例無有過不與之文中書省司郎中成遵以爲賣官鬻爵已非令典况又賣與奸淫之人其何以爲治必奪其勅還其粟著爲令乃可從之。

草木子曰天下治平之時臺省要官皆北人爲之漢人南人萬中無一二其得爲者不過州縣卑秩蓋亦僅有而絕無者也後有納粟獲

功二途富者往往以此求進令之初行尚猶與之及後求之者衆亦絕不與又獲功之官於法非得風憲體覆牒文不輒命官憲使招權非得數千緡不與行遣故有功無錢者往往事從中輟皆抱怨望其後盜塞寰區空名宣勅遇微功卽填給人已不榮之矣方國珍之初亂也有宣數道勅十數道懸以購人立功及有功亦竟不與

明朝工部尚書嚴震直禮部尚書鄒沂以稅戶人才起通政使樂憚以輸粟起

景泰元年以邊圉事殷令天下生員納粟上馬者許入監其上選事例與歲貢同自後納粟入監此其肇端云

王氏曰按我朝納粟入監事例濫觴於此其源一開末流不可復塞後來遂援此例以賑饑甚至援此以接濟大工無止息之期自正統以來承平日久天下之事無不日入於玩愒而太學

甚祖宗朝最重太學慎選貢徒文行兼備者積分自廣業堂升率性堂卽得銓選京職方面與進士等故洪熙初猶選監生吳信等爲給事中厥後其法寢廢迨至納粟上馬例行與舉貢皆以例挨次撥歷聽選無復教養之實祖宗良法美意其尚存而不至於斷盡者幾何閱歷世變何可勝慨

或曰洪武中嘗取稅戶人才用之納粟入監非卽其遺意耶得失何以異曰聖祖之意以貧而仕者常貪故選才於閭左蓋取洪範正人旣富方穀之義而非有所利之也然謂之選則必擇其闔族之賢而後舉之非槩用之而無別也

生員吏典納銀事例弘治以前猶暫行復止人數有限今則無限數無止息之期矣向猶爲接濟軍旅饑荒之用出於不得已今則爲接濟土木之功矣向猶以爲不美之政廷臣屢經議革今則

循習視爲當然爲常事爲不可已之規不可無之舉而無復有嘗議之者矣。

嘉靖四十三年正月戶部尚書高耀奏薊鎮缺乏糧餉數多乞開空運事例請于歲貢援例等監生預授在外布按二司經歷等官經歷五百兩至檢校一百二十兩各有差其官員出身從七品一百六十兩至從九品六十兩各有差從之及是年四月空運例行。

丙寅秋九月吏部尚書胡松奏推廣事例納銀醫生楊柳汪文翰等遙授太醫院吏目監生徐懋德遙授光祿寺監事等官。

王氏曰按貨筭入官昉於西漢謂任富可不貪也厥後邊費不足輸選成俗雖張釋之黃霸卜式司馬相如咸由是出不以爲諱然終西漢之世得人四五而已唐宋以來亦間行之大抵由軍興顧匱非獲已也我朝宣德以前科貢之途入太學者猶須精擇戒其

庸濫至于景泰始以口人內犯邊境多虞開生員納粟納馬入監之例然是時多不過八九百人而已而吏部尚書王直禮部郎中章綸咸以爲言禮部侍郎姚夔議覆遂尼不行成化初復開納糧納草納馬之例未久而止二十年山西陝西大饑民相食大臣以救荒無善策不得已又開納粟入監限年餘卽止時入監者至六七千人於是令入監者過兩月則放依親有願自備薪米寄監讀書者聽尋又令納粟監生年二十四以下願坐監者自備薪米寄監讀書扣年二十五歲以上方准食糧收撥二十二年令納米銀監生到監兩月放回原籍收克增廣生員年二十以下者八年二十以上者五年滿日行取入監坐班序撥弘治十年有直隸民生赴山西納粟冒年違例入監已經撥歷巡按御史查出治罪奏克增廣生員五年已滿復監肄業正德四年爲預備邊儲令納銀監生

年二十五以上發監肄業二十五以下送監寄名放回依親扣年二十五歲以上起送復班五年令納銀監生照前例自備薪米寄監讀書有自北監告入南監者南京禮部查食糧年月仍照二十四歲以下事例寄監放回原籍讀書扣年二十五歲以上復班十二年以後或以賑濟或以防禦或以傳奉開上粟入監之例於是納銀之途益廣矣十六年世宗入繼大統詔嚴止之嘉靖四年又復暫開然須提學官考其能通文義者兩京十三省限不過五千人時有各王府典膳引禮等官青衣社學生亦皆得援例入監十年五年禮部議以依親給假援例生員限三月以裏起送前來送監肄業如有過違照例送問其私自逃監者許該監查報本部轉行法司提問依律例治罪奉旨納銀例貢逃監三月以外發回原籍肄業近年太僕缺馬戶部缺邊費乃開例益濫遂至市井恒人皆

得借俊秀名目輸粟入監者注選銓部者至數萬人歷考先朝雖不獲已而行此例然必各提學官試其文理通者而後許之又各地方俱限以名數又年二十五以下者雖寄監不得食糧收撥近時此例俱未申明是以總州市童得升太學懶頑俗子亦齒諸生其間英俊由此而擢名科第表樹勲猷夫豈無人然千百而什一耳雖然漢唐以來官輒以賞授其不才者且若之何今國家雖入其貨猶必教之學而後使之仕視往代之法爲愈矣職師儒者惟當仰體朝廷曲成之意未可漫以賞途略之也

按國初祇以徵聘薦舉賢良孝廉明經儒士入官已而開歲貢之例重舉人進士之選而以賞發身所未覩也雖洪武中有稅戶人才之擢然止取其富厚純朴而非計其賞也景泰中始以邊費令民納粟納馬而賞選蓋權輿矣繼是而納級又繼是而空運而此

道益濫觴焉。然嘉隆以來，輸粟子弟往往掇取巍科，是又可以貴選少之哉。

方技

遼景宗保寧時，王白以善卜筮，歷官彰武興國二軍節度使。聖宗統和初，耶律敵魯以精醫為韓德讓所薦，官至節度使。道宗清寧中，耶律裏履善寫真，官至太子太師。

元世祖至元二十四年，弘州匠官以犬兔毛製如西錦者以獻，詔匠官知弘州。

二十七年，括天下陰陽戶，仍立各路教官，精于藝者歲貢各一人。成宗大德十一年，遙授教坊司官沙的為平章事。

武宗至大元年，詔諸內侍太醫陰陽樂人毋授常選散官。

順帝至正六年秋七月，時有以音樂得幸者，帝命為崇文監丞、參政、

兒直班他擬一人以進，帝怒曰：「選法盡由中書耶？兒直班頓首曰：『用幸人居清選，恐後世議陛下。』今選他人，臣實有罪。帝悅。

明朝文臣入仕正途，惟有進士鄉科歲貢選貢，而賢良方正人材舉薦亦次之。其有不由是途而登大位者，倣貴與例入方技目，而一二上書執役守城歸化者附焉。

洪武中，周淵以能書任大理丞，周或由上書錄用任通政使。方繼先

殷宗直實守真，顧中楊鑑、陳繼善、徐成五俱老人任御史。丘玄清以全真道人任太常卿。

建文中，袁復以能書任大理少卿。

永樂中，金問以楷書任南禮侍。

宣德中，凌晏如以楷書任僉都御史。沈度以能書任學士，度弟

以能書任大理少卿 吳訥以醫生任南左副都御史 張天駿以能書官禮尚

正統中丁鑑以楷書任刑侍 陳學以楷書任鴻臚卿

景泰中趙榮以楷書任工尚

正德中周惠疇由儒士管工任工尚

嘉靖中張電以能書官禮侍談相以能書官工侍王槐以能書官工

侍程南以習字生官太常少卿 陳道瀛徐可成以樂舞生任工尚

太子少師贈少師榮國公姚廣孝左布政使吳印華克勤俱以僧

翰林應奉李願證輩亦然 禮部尚書蔣守約李希安崔志端工部

尚書陳道瀛徐可成禮部左侍郎丁永中金贊仁師宗記俱以太常

神樂觀道士然不由太常寺 太子太保禮部尚書贈少保許紳禮

部左侍郎蔣宗武通政司通政使掌太醫院事施欽仲蘭李宗周張

鑾徐偉嘉靖中任俱醫士 兵部尚書贈少師金忠浙江鄞縣人任

山善卜 鴻臚序班趙九成以善棋禮侍湯序康永韶由天文生

禮部尚書邵元節少師少傅少保尚書陶仲文禮部左侍郎掌通政

司事李孜省太常寺卿鄧常恩趙玉芝凌中俱以方術得幸 工尚

萬祺由推命太常卿顧玃以巫師 兵尚單安仁布政使張真等俱

以武弁遷 工尚徐杲工侍蒯義蒯鋼蔡信郭文英俱由木工工侍

陸祥由石工 禮侍李嘉奉祠禮生 禮侍張俊以諳書寫 太常

卿杜安道洪尚觀俱由櫛工 太常寺丞贈少卿袁珙子尚寶司少

卿忠徹由善相 光祿寺卿徐興祖井泉俱厨役累陞 布政使蔡

春王興宗俱以皂隸出身 太子太保左都御史楊善太子賓客戶

部尚書劉中敷太常寺卿崔文奎俱守城諸生 刑部尚書安童工

部侍郎也先帖木兒忽哥赤治書侍御史瑣納兒加右副都御史咬

續文獻通考卷之九
住四川左叅政閻乃馬反俱蕃口歸順。按察副使裴叔耆潘季佑太僕寺卿趙煜以安南國歸順人季佑僞太保也。後以叅政掌又安府事。工部尚書黎澄子侍郎叔林以神鎗澄卽僞虞太皇黎蒼弟。

舉官

宋江東轉運司副使真德秀奏曰太平興國中嘗詔諸道轉運司察訪部下官吏凡罷軟不勝任及黷于貨賄者俾條上其事狀其清白自守幹局不凡者亦許其明揚臣仰見祖宗盛時選用監司付以事權者蓋欲其公於刺舉使貪懦者無所容而廉能者有所勸責任之意蓋不輕也自嘉泰開禧以來公道不行請囑曰盛郡縣之官有罪狀彰灼爲監司者甫欲劾已求要路之援以自脫甚者得以施其反噬之計於是刺之權有不行矣歲舉之員往往奪於權貴之命孤寒無援者雖盡心職業不免陸沉之歎膏梁庸碌者苟有所挾則

執券以取償焉於是舉之權又有所不行矣是以州縣之間賢否不分民受其病。

理宗寶慶元年詔今後見供職及在外帶職從官從元祐十科舊制歲舉三人從右正言麋灑請也。

淳祐元年詔求人才令內而特從兩省卿監郎官外而宰執侍從帥臣監司各舉二三人。

景定四年詔令侍從臺諫給舍卿監郎官以上及制總監司各舉所知不拘員限以待量才擢用後不如所舉則連坐之制宜在必行。

遼聖宗統和中詔諸部所俘宋人有官吏抱器能者具以名聞遂官衛德升等六人。

聖宗獵雲中故事車駕經行長吏必有所獻節度使進曰臣境無他產惟幕寮張儉一代之寶願以爲獻。

興宗重熙九年十二月詔諸職官有治民安邊之略者悉具以聞
金世宗大定二年詔隨朝六品外路五品以上官各舉廉能官一員
三年定制若察得所舉相同者即擬旌除若聲跡穢濫所舉官量約降
罰

八年七月諭平章政事完顏思敬曰朕思得賢才寤寐不忘自今朝官
出外即令體訪外任職官廉能者及草萊之士可助治者具名以聞

二十九年十一月章宗七即位諭宰臣用人無拘資格時上以選舉十事命

奉御台魯論尚書省定擬

章宗明昌元年八月選才幹之官為諸州刺史皆召見戒諭之

宣宗興定三年十月定保舉縣令能否黜陟舉主格

十一月詔朝官七品外路六品以上官歲舉縣令一人

監察御史完顏素蘭上言曰臣近被命體問外路官廉幹者擬以差

遣若懦弱不公者罷之其申朝廷別議擬注臣伏念彼懦弱不公之
人雖令罷去不過止以待闕者代之其能否又未可知或反不及前
官蓋徒有選人之虛名而無得人之實跡古語曰縣令非其人百姓
受其殃今若後官更劣則為患滋甚豈朝廷恤民之意哉夫守令治
之本也乞令隨朝七品外路六品以上官各舉堪克司縣長官者仍
明著舉官姓名他日察其能否同定賞罰庶幾其可議者或以閱選
法紊資品為言是不知今之事與平昔不同豈可拘一定之法坐視
斯民之病而不權宜更定乎

元世祖至元八年詔舉守令以戶口增田野闢詞訟簡盜賊息賦役均
五事備者為上選陞一等四事備者添一資三事有成者為中選依常
例遷轉四事不備者減一資五事俱不舉者黜降一等

監察御史魏初上疏曰舊制常叅官諸州刺史上任三日舉一人自

續文獻通考卷之九
代况風紀之職與常員異請自今監察御史按察司官在任一歲各舉一人自代所舉不當有罰不惟砥礪風節亦可爲國得人
二十八年詔路府州縣除達魯花赤外長官並宜選用漢人素有聲望及勲臣故家并儒吏出身資品相應者佐貳官遴選色目漢人參用庶期于政平訟理民安盜息

趙天麟策略曰選用之法莫貴於德莫急於才才德兼全者大丈夫也德勝才者君子也才勝德者豪英也有德無才者淳士也有才無德者小人也才德兼無者愚人也淳士以上四德皆所常用也小人愚人皆所當棄也於是辯三德分而爲九科簡八才分而爲二十六等所謂三德九科者一曰正直之三科直而濫也亂而敬也擾而又也二曰剛德之三科剛而塞也強而毅也簡而廉也三曰柔德之三科柔而立也愿而恭也寬而栗也翁受敷施九德咸事臯陶告舜詳

具虞書所謂八才二十六等者一曰贊化之才三等文史也禮官也樂官也二曰銓選之才三等知人也敬賢也考校也三曰風憲之才二等糾察也廉訪也四曰戎事之才六等宿衛也籌計也督領也鎮防也屯田也芻養也五曰政事之才四等使臣也決斷也農桑也董役也六曰監守之才二等關津也營造也七曰錢穀之才二等明利也筭數也八曰方術之才四等僧官也道官也醫官也陰陽也八等之才以德爲基方今俳優之戲具見喜之庸人間有懸金印衣紫服者竊恐臣下或有勤勞將士或有當賞而覆盆難照者聞斯事則不能不起悵悵之心而解其體焉此馬周所以恥騶豎倡子鳴玉曳履同立於朝而上疏以諫文皇也伏望陛下以三德九科八才二十六等之說明諭選曹使之從事於斯凡未嘗進而初進者據此法而置之於所宜之方凡已進而考當流轉者據此法而就改於當然之地更

望陛下惜名器之重勿以假于人如是而行之何患弊之不革乎何患官之不稱乎官稱而政成政成而民安民安而國慶也

陶安曰銓選重內輕外自古爲然今官京師者稱美任官中原者次之江南又次之接境又次之邊遠又次之故仕由江南者不得歷中原自中原出邊遠必超進資格用是莫不重京師中原而樂趨於江南接境邊遠槩視以爲輕惟風憲則不然天下分道二十有二其勢均一在內者固重而在外者亦不輕

成宗元貞元年命廉訪司及省臺選官覈實定其殿最以明黜陟以阿合馬桑哥怙勢賣官選法大壞故有是命

大德三年

立遷官之法從七以下屬吏部正七品以上屬中書三品以上非有司所予奪由中書取進止自六品至九品爲勅授則中書牒署之自一品至五品爲宣授則以制命之其理筭論月日遷轉憑散官內任以

三十月爲滿錢穀典守以二歲爲滿而理考通以三十月爲則內任官率一考陞一等十五月進一階京官率一考視外任減一資外任官或一考進一階或兩考陞一等或三考陞二等四品則內外考通理此秋毫不可越然前任少則後任足之或前任多則後任累之一考者及二十七兩考者及五十七月三考者及八十一月以上遇陞則借陞而補以後任此又其權衡也

仁宗皇慶元年十二月中書省臣言世祖定立選法陞降以示激勸今官未及考或無故更代或躡等進階僭受國公丞相等職諸司已裁而復置者有之今春以內降旨除官千餘人其中欺僞豈能悉知壞亂選法莫此爲甚帝曰凡內降旨一切勿行

文宗至順三年監察御史陳思謙言銓選之弊入仕之門太多黜陟之門太簡州郡之任太淹朝省之除太速欲設三策以救四弊一曰至元

二十年以後增設衙門冗濫不急者從實減并其外有選法者并入中書二曰宜參酌古今設辟舉之科令三品以下各舉所知才則受賞失實則受罰三曰古者刺史入爲三公郎官出宰百里蓋使外職識朝廷治體內官知民間利病今後歷縣尹有能聲善政者受郎官御史歷郡守有奇才異績者任憲使尚書其餘各驗資品通選在內者不得三考連任京官在外者須兩任乃遷內職績非出類守不敗官者則循以年勞處以常調凡朝缺官員須十二月之上方許遷除命中書議行之元朝舊制銓曹有行止科吏主之日具內外官十名上中書省中書籍以遷擢其後吏怠不爲意仕者淹滯有待選十餘年者至正時危素責吏日具五名五日一上中書吏樂易習各思奉職而久滯者獲申明朝初令在外官員有政蹟者舊制許巡按等官奏舉其後又有旌異之名今錄事例于後

凡監察御史按察司官巡歷去處但知有司等官守法奉公廉能昭著者隨即舉聞

建文帝詔內外五品以上文官及縣令薦賢才定保舉連坐法
洪熙元年十月都御史劉觀奏舉才能之士前應天府尹于潛等十餘人上曰卿大夫所舉必當昔孫抃言吾輔政無功惟薦一二臺臣無愧卿等必能知此復諭之曰古者除官則署舉主姓名貪穢則連坐今亦當循此法

宣德元年十二月楊士奇薦行人王翱爲山東道御史七年八月上御奉天門視朝罷召楊士奇楊榮至榻前諭曰今春命京官三品以上者舉方面郡守後又出舊作招隱荷蘭之詩以示意已踰半歲都不舉一人視朕言爲虛文吏部怠忽至此其降勅責之
成化七年奏准有司官員必待三年六年政績卓異方許薦舉仍令吏

部先察舉主舉者廉卽用其人不必覆勘舉者非人雖有政績亦必覆勘

弘治六年奏准各處巡撫巡按并布按二司遇府州縣官才行俱優者無分歲貢吏員出身一體錄舉五品以上官員果有才德出衆者開報本部奏請定奪

嘉靖九年題准撫按薦舉官員須歷任年深政績卓異方許舉奏若有不公及所舉之人或以貪酷等項問革吏部舉奏連坐

四十五年議准撫按官在地方未及半年丁憂養病者俱不許一舉舉幼

萬曆十年議准撫按官舉劾應會同者照例會同如果獨見甚真卽從直具奏不必以異同爲嫌

凡在外有司官員果有政績深得民心者任滿去職許令百姓保留

辟舉

宋理宗寶慶三年詔銓部今後司法參軍不許以諸司年勞出官人注授諸道檢法官照條格差注意司無得妄辟從梁成大之奏也

金宣宗貞祐三年三月詔河北州縣官令文武五品以上辟舉不聽以他事差占仍勒終任有勞績者但陞遙領之職應降罰者亦止本處居住時河北殘毀吏治多苟且故著是令

哀宗正大元年立辟舉縣令法命監察御史司農司官先訪察隨朝七品外路六品以上官清慎明潔可爲舉主者然後移文使舉所知仍以六事課殿最而升黜舉主旣爲之盡心而被舉者亦爲之盡力是時雖迫危亡而縣令號得人由作法有足取云

元初世祖分藩在秦辟蕭剌楊恭懿韓擇侍秦邸薨以疾辭授陝西儒學提舉不起

世祖初凡諸王分地與所授湯沐邑得自舉其人以名聞朝廷而後授其職

陶安曰銓衡重守令之選而經歷次之蓋不輕以授人也自幕寮不辟於長官而命于朝得以均禮抗論彼可于上此否于下彼非于前此是于後準律而裁之當也據理而行之決也其責任豈易乎哉又曰朝廷立制使士出而致用其目有三曰進士也曰學官也曰儒吏也州郡吏曹士或不屈從而進士拔一千千百未易粹與寧受辟為學官耳

至元十九年詔兩廣福建五品以下官從行省就便銓注二十六年詔以雲南行省地遠州縣官多闕六品以下許本省選辟以聞明吏部職掌凡內外大小官員悉聽本部銓除轉擢並無辟舉之例間有撫按官以地方多事奏請改調陞職者亦必下吏部覆議再奏然後

允之

隆慶元年十二月吏部請令兩京九卿三品以上堂上官併各科道等官博訪才畧過人忠誠任事可任諸邊督撫兵備有司及熟知屯鹽利弊堪清理鹽屯之選者各舉所知上請簡用異時功罪併及舉主上從之

萬曆十九年三月兵科給事中葉初春奏議舉劾曰夫官紳才品有賢有不肖黜一不肖所以為用一賢者地也但世所稱不職雖出郡佐邑長而監司以上鮮可尋刺惟在攬轡之臣加之意而已邇來按差復命指摘過嚴于卑秩低昂脫畧于大寮卽有論列多取離任而見在鮮及卽論列見任多擬降調而重處罕聞矣以故彰瘡風微去留途塞甚至衰朽不堪士論共鄙者尚不甘心安分反噬嘵嘵國家綱紀所存幾何

考課

宋寧宗嘉定九年詔邊縣擇才不拘常制其餘並遵三年之制十年嚴試法官七等之制

遼太宗會同二年閏七月以南王府二刺史貪蠹各杖一百仍繫虞侯帳備鬼箭選郡臣爲民所愛者代之三年六月東京宰相耶律羽之言渤海大素賢不法詔察佐部民舉有才德者代之

金考課法凡內外官之政績所歷之資考更代之期去就之故秩滿皆備陳于解由吏部據以定能否又撮解由之要于銓擬時讀之謂之銓頭又會歷任銓頭而書于行止簿行止簿者以姓爲類而書各人平生所歷之資考功過者也又爲簿列百司官名有所更代則以小黃綾書更代之期及其所以去就之故而制其銓擬之要領焉凡縣令則省除部除者皆通書而各疏之

章宗明昌三年九月上問考課法今可行否右丞相夾谷清臣曰行之

亦可但格法煩則有司難承用耳尚書右丞劉瑋曰考課之法本于核名實今提刑司體察廉能賊濫以行賞罰亦其意也若別議設法恐涉太煩上問唐代何如瑋對以四善二十七最六年十一月初定縣官增水田升除制承安二年十一月諭尚書省猛安謀克既不隸提刑司宜令監察御史察其臧否

章宗泰和元年十月御史臺奏在制按察司官比任終遣官考覆然後尚書省命官覆覈之今監察御史添設員多宜分路巡行每路女直漢人各一人同往從之仍勅分四路

四年四月定考課法准唐令作四善十七最之制四善者一曰德義有聞二曰清慎名著三曰公平可稱四曰勤恪匪懈十七最者一曰禮樂興行肅清所部爲政教之最二曰賦役均平田野加闢爲牧民之最三曰決斷不渝興廢當理爲判事之最四曰銓束吏卒姦盜不行爲督領

之最。五曰案部分明評議均當爲檢校之最。以上皆課縣令簿丞警巡使副錄事司侯判官也。六曰詳讞合宜咨執當理爲幕職之最。七曰盜賊消弭使人安靜爲巡捕之最。八曰明于出納物無損失爲倉庫之最。九曰訓導有方生徒克業爲學官之最。十曰檢察有方行旅無滯爲關津之最。十一曰堤防堅固備禦無虞爲河防之最。十二日出納明敏數無濫失爲監督之最。十三曰謹察禁囚輕重無怨爲獄官之最。十四曰物價得實姦濫不行爲市司之最。十五曰戎器完肅捍守有方爲邊防之最。十六曰議獄得情處斷公平爲法官之最。十七曰差役均平盜賊止息爲軍職之最。五年十二月更定考試隨朝檢知法條格。八年十月以軍民共譽爲廉能官條附善最法。此條明昌四年所定宣宗貞祐三年詔司縣官能募民進糧五千石以上減一資考萬石以上遷一官減二資考二萬石以上遷一官陞一等注見闕。

興定元年行辟舉縣令法以六事考之一曰田野闢二曰戶口增三曰賦役平四曰盜賊息五曰軍民和六曰詞訟簡。八月更定監察御史失察法。

時李英爲御史中丞上言兵興以來百務皆弛其要在於激濁揚清獎進人才耳。近來改定四善二十七最之法徒爲虛文。大定間數遣使分道考察廉能當時號爲得人願改前日徒設之文遵大定已試之效庶幾人人自勵以爲國家用納之。

元制凡官員考數從九品擬歷三任陞從八品正九品歷兩任陞從八正八品歷三任陞從七從七品歷三任呈省正七品歷兩任陞從六從六品通歷三任陞從五正六品歷兩任陞從五從五轉至正五緣四品闕少通歷兩任須歷上州尹一任方入四品內外從四品通理八十月陞三品。

世祖中統三年詔置簿立式取會各官姓名籍貫年甲入仕次第元至
七年尚書省臣言管民官遷轉以三十月爲一考數於變易人心苟且自
今請以六十月遷轉從之十年定內外官復舊制三歲一遷十七
年立遷轉官員法凡無過者授見闕物故及故犯選人補之滿代者令
還家以俟十九年定內外官以三年爲考滿任滿者遷敘未滿者不
許超遷二十八年詔改提刑按察司爲肅政廉訪司每道仍設官八
員除二使留司以總制一道餘六人分臨所部如民事錢穀官吏奸弊
一切委之俟歲終省臺官遣官考其功效三十三年增課守令式于
八年所定五事外又增以勸課農桑克勤奉職者陞獎其怠于事者管
罷之五事在
選舉類

集賢直學士兼秘書少監程鉅夫奏道府州司縣下至曹掾等各給
出身印紙曆子一卷書本人姓名出身於其前俾各處長吏聯銜結

狀保明書其歷任月日在任功過于後秩滿有司詳視差其殿最
東平布衣趙天麟上太平金鏡策畧曰舉世英賢多皆一節爲人上
者取節可也今國家選法腹外三年爲一考腹內二年半爲一考自
非負罪之員皆有進而無退臣以爲方今選法宜以賢能爲先不宜
以日月爲上且人才有大有小例以初仕者職小則淹滯英才例以
久宦者職遷則施爲安得皆稱切恐郡縣之官以苟且存心有更張
之事則計之曰三年之後吾將去此何勞吾心哉因循而已矣見賄
賂之物則思之曰一旦交代未獲卽除何以爲家費哉營資而已矣
又况郡縣之民迎新送故甚爲勞費其弊將至於無如之何者或以
郡縣之官久則擅權生事錢穀之官久則私弊難制臣謂此言非也
若循三德八才而用之則皆才德應官之人矣伏望陛下量其長短
察其可否細木常使爲楠大木常使爲栁凡內外官員三年第一考

爲初考上等加官階二級中加一級下則仍舊階而上中下三等皆復守其本職六年再考如初考而復守本職九年終考如再考然後黜陟其職也凡考法令廉訪司官重其保結考其行實而牒司路以達于上司銓定階次籍記倚閣凡三考黜陟其事業循常者依累次官階而除之以次第所宜其才德超異者雖階次甚卑而待之以不次之位如是則居官守祿者旣思階次之超陞而盡其公道又懼憲職之知覺而滅其私心庶幾乎選法有以定矣

天麟論考幽明曰唐朝以體貌豐偉爲貴所謂市瓜喜大而或失其香晉室以清談虛曠爲先所謂畫餅克饑而委無真用此唐之不能及三代而晉之不能及漢唐也今國家入仕之門太多考選之方太闕臣以爲王者之左右陪僕亦貴乎正不正則如蝸蠹之內生天下之大官小吏並須乎賢不賢則如蝗螟之外起臣謹依經考史斷以

愚意條陳聖人之九徵及當今所切二十六美之三十九類與夫三要惟陛下察之所謂九徵者一曰遠使之而觀其忠二曰近使之而觀其敬三曰煩使之而觀其能四曰卒然問焉而觀其智五曰急與之期而觀其信六曰委之以財而觀其仁七曰告之以危而觀其節八曰醉之以酒而觀其則九曰雜之以處而觀其色所謂二十六美之三十九類者一曰文史之美三類草制節詔諄悉詞情也校書正字可爲定體也教誨後學才德多成也二曰禮官之美三類補袞拾遺將順其美也朝會祭祀儀章丕舉也宣慰風俗雍熙聿致也三曰樂官之美一類金石宮商條理聲正也四曰知人之美一類善惡周覽洞曉于心也五曰敬賢之美一類推轂進士常若不及也六曰考校之美一類彰善瘴惡照文無失也七曰糾察之美一類彈劾所至不避權豪也八曰廉訪之美二類廉察官吏傲懼肅清也訪問風俗

化成禮義也。九日宿衛之美一類。小心周密京輦增威也。十日籌計之美二類。帷幄畫計折衝倒戈也。排壘整陣臨時合權也。十一日督領之美三類。器械精完士卒閒習也。號令嚴明部伍齊肅也。臨敵耀威身先士伍也。十二日鎮防之美一類。勸勵稼穡勤事多獲也。十四日芻養之美一類。孳蓄頭匹苗壯蕃滋也。十五日使臣之美二類。喉舌宣納成美昭光也。委幹事務辦濟平允也。十六日決斷之美三類。勾檢考覈瑕隙無隱也。要察圓明囚無閒言也。疑獄得情處置合律也。十七日農桑之美一類。董督樹藝水旱有備也。十八日董役之美一類。監役合宜丁夫悅事也。十九日關津之美一類。姦詐不漏行旅不壅也。二十日營造之美一類。練事分功捷于供奉也。二十一日明利之美一類。出納有常簿籍易照也。二十二日筭數之美一類。多寡有方了然胸臆也。二十三日僧官之美一類。弘宣釋教守戒精嚴也。

二十四日道官之美一類。弘宣道教守德精嚴也。二十五日醫官之美二類。科品分明舉無不應也。開發後學成材者衆也。二十六日陰陽之美二類。歷法推步授時無舛也。卜筮循經不爲詭異也。所謂三要者。一曰公。二曰廉。三曰勤。徑情服事不邀功利。謂之公。賄賂在前不以爲念。謂之廉。服勞王室悉心竭力。謂之勤。九徵之徵盡矣。二十六美之類備矣。三要之要具矣。選法考校之源委終矣。始以三德入才用之。終以二十六美三要考之。則自中及外大小官吏若玉壺之冰。秋霜之月。凜乎其清皎乎。其明矣。

武宗至大二年。令州縣正官以九年爲任。三年給親民長吏考功印。曆令監治官歲終驗其行蹟書而上之。廉訪司。御史臺。尚書禮部考校以爲黜陟。

明洪武五年十二月。勅中書令有司。今後考課必書農桑學校之績。官

民有不奉天時負他利及師生情於教學者皆論如律

山西汾州平遙縣主簿成樂考績州上其考曰能恢辦商稅上日地之所產有數官之所取有制若曰恢辦是額外剝削主簿之職在佐理縣政撫安百姓豈以恢辦爲能州之考非是

十一年三月河間府知府楊冀安等考績入朝上命吏部曰考績之法所以旌別賢否以示勸懲今各官來朝宜課其殿最第爲三等稱職而無過者爲上賜坐而宴有過而稱職者爲中宴而不坐有過而不稱職者爲下不預宴序立于門宴者出然後退庶使有司知所激勸

十七年八月吏部尚書俞胤定考績法

近例惟試御史一年考覈實授試中書舍人三年考覈實授主事署郎中員外郎六年考覈實授員外郎署郎中三年考覈實授其餘京官一年考覈之例俱不行

凡一二品官考滿賜羊酒鈔錠尚書都御史六年考滿加太子少保九年加太子太保吏部尚書有三年卽加太子少保六年加太子太保者內閣三六九年考滿應陞官秩取自上裁其一品九年考滿或賜宴或賜勅獎勵及誥命廕子等項俱出特恩或奉旨查例議擬奏請

永樂元年令府州縣官到任半年之上者巡按御史按察司察其能否廉貪之跡具奏

成化五年閏二月大理寺評事申安言旌異之典朝廷所以激勸有司乞詔大臣議自今旌異必待三年考滿之後若所舉不公後以姦貪敗者連坐庶幾吏稱其職民安其業

嘉靖十九年題准今後撫按官于六品以下有司貪酷不法者許徑自拏問不待奏

隆慶間吏科王治等疏飭吏治三事其一定等則以辨材賢欲以三

等九則評論方面有司官其二公論劾以一事體其三修實政以圖治安

掌吏部事高拱言外官考才力不及者不徒曰調用而必曰酌量調用原無定議然部院考察與撫院論劾槩以不及則銓補之日無所適從尚得遷就其間自今方面有司有才不宜於地者當移其地不易其官署曰調簡僻有官不稱其才者雖易其官當仍其品署曰調閒散亦有操守未壞性氣稍偏而有他長可錄年勞當敘者署曰降級或才力不宜有司文學猶堪造士者署曰改教四者皆麗不及之條者也至于先以調簡再考不及者此終難策勵議從罷斥直置罷軟之下奏可

考察京官

京官考察以五年為期亦分四等年老有疾者致仕貪者為民不謹者冠帶閒住浮躁淺露才力不及者降一級調外任

凡考察京官每十年一次舉行不拘見任帶俸丁憂公差養病省察等項俱公同本衙門堂上官考察

弘治十七年八月令京官六年一考察

朝覲考察

明初外官每年一朝洪武二十九年始定三年一朝之制以辰戌丑未年為期朝正後本部會同都察院考察奏請定奪其存留者俱引至御前刑部及科道官各露章糾劾怠職之罪一時譴責有免皆出上命及有免還任各賜勅一道以申戒飭云

凡在外官員三年徧行朝覲其各布政司按察司鹽運司府州縣及土官衙門流官等衙門官一員帶首領官吏各一員各理問所官一員各衙門先儘正官正官到任日淺佐貳官到任日久必先佐貳官來朝若

係裁革未及二十里長州縣止設正官首領官各一員去處只令首領官吏來朝。

明朝定例凡天下諸司官每三年一入覲除市舶提舉司外浙江等布按順天應天所屬及直隸各府州縣鹽運使太僕苑馬鹽課提舉司官各帶首領官吏各一布政使理問一上林苑監各署及各土官官吏各一茶馬司吏一若裁減處首領官帶吏一名照原降到任須知文冊親齎奏繳官儘正官如正官任未及三月方以次代。

洪武八年春正月辛酉朔各省郡縣入朝上以濟寧知府方克勤有善政錫燕儀曹吏部言天下布按二司及府州縣朝覲官凡四千一百一十七人考其政績詔稱職者陞平常者復其職不稱職者降貪污者送法司罪之闕茸者免爲民。

正統十年令朝覲官員廉能著稱治行超卓賞衣服一襲鈔一百錠仍

賜宴于禮部。

成化二十三年正月吏部尚書李裕建言朝覲考察天下官員乞創立才力不及一例照品級調簡僻衙門用從之遂爲定制。

弘治元年令考察罷閒官吏在京潛住有擅出入禁門交結者各門官盤詰拿送錦衣衛打一百發烟瘴地面永遠充軍。

嘉靖八年令來朝官員各陳地方民情利弊興革事宜。

二十四年奏准各衙門黜退降調官員不許在京潛住造言生事撫拾妄奏違者不分有無冠帶俱發口外爲民。

隆慶二年正月陝西副使姜子羔言入覲官各有道里費及餽遺私齎宜令進獻羨餘以佐國計疏入上曰進獻非事理朝廷亦不藉此足用不許第以諸司路費皆取諸民令御史查照原給銀數追收貯庫自後進表朝覲官更不得派給累民。

軍官考察事例

萬曆二十二年三月兵部奏兵科都給事中張棟等條陳三事一議軍政之限所當定大約爲各省直考選軍政前後具奏參差不一乞要一如文臣考察事例依期具疏本部覆議上請此後撫按凡遇五年考選軍政無論地方煩簡路途遠近俱先時考定于該考年分十月內齋疏到京十一月初一日赴通政司類報具奏本部查明類覆又議考選之例所當重大約各省直軍政奏冊參差違例及謂賢否失真進退不一乞要定爲典制凡軍門考選具奏之時以奏冊送科青冊送部如于應薦者止擬其二三實事而錄之不必爲四六之套語若全材爲難或用其所長畧其所短不嫌並陳鼓舞之中寓砥礪之意於應劾者亦據其二三實事而刺之無盡據訪單之風聞若貪暴顯著或審實於被害或審實於佐証然後提問參問之後無展轉之端又議武官糾拾

之例所當嚴大約爲邊腹將領及錦衣衛南北司官糾拾不及無以示懲經文察者擯斥終身經武察者有薦復用文察則藩臬郡邑之長俱集於京師採訪爲便武察則止據撫按之疏以爲去留此外耳目難寄體察難周且慮棄而復用必生玩易慎無輕棄以免數易錦衣衛南北兩司不在自陳之例先年亦嘗糾拾今應酌議除僉書都司及守備把總備禦提調等官仍聽各撫按考察或不時論劾外則邊腹副叅遊擊掌印都司及錦衣衛南北兩司凡遇考選畢日悉聽言官糾拾如漏網者多則不拘泥于舊數以致倖免如應刺者少則不必盡取盈于舊數而爲苛求庶武弁皆知惕勵而于軍政大有裨矣

王官考察事例

隆慶三年題准除良醫典史人原無陞補照舊不考外其護衛首領典簿典膳奉祠典儀典簿典史正教授及郡王教授典膳等官務與

丘氏濬曰處士橫議必在國家未造當隆盛時無此事也方漢盛時無有所謂浮議也而黨錮之興乃在桓靈之世宋時忠厚立國不殺士大夫當時士大夫毅然以氣節名義爲重一遇國家有事輒明日張膽別白言之不少顧忌往往以此得美名躋顯位不幸觸諱遭遷謫以去及其事久論定直聲勁節亦從此益大以著士大夫習見其然其中不逞者遂借此以爲取名之階進身之徑其流弊之極遂至學校所養之士亦效尤之至于景定淳祐之間朝廷任一宰執用一臺諫稍不若衆心三學之士相率攻之必去其人而後已賈似道入相度其不可以力勝遂以術籠絡之于是加太學餐錢寬科場恩例三學之士啖其利而感其恩目擊似道之誤國噤不敢出一聲甚至要君去國亦上書贊美挽留之無所不至嗚呼三學諸生平日所以叩閣上書經臺投卷者無非仁義之言聖賢之道至是其心迹盡露矣嗚呼士大夫之在學校者尚知所以自守而毋蹈宋人之失哉或曰學校之士遇國家有事上下蒙蔽之時亦可以默與曰漢之王咸唐之何蕃宋之陳東當言而言專爲國而不爲私是固君子之所與也

宗學 寧宗嘉定七年復建宗學置博士教諭各一人弟子員百人在屬籍者三歲一試補弟子員如太學法 九年以宗學隸宗正寺小學 理宗嘉熙元年詔建內小學擇宗子十歲以下資質美者二三人置師教之 七年詔皇姪孟啓特授宜州觀察使建資善堂于內小學置直講贊讀二員

遼太祖時置上京國子監設祭酒司業監丞主簿 時南京立太學金海陵天德三年始置國子監定制詞賦經義生百人小學生百人以宗室及外戚皇后大功以上親諸功臣及三品以上官兄弟子孫年十

五以上者入學不及十五則取有物力家子弟年十三以上二十以下者充凡會課三日作論策一道季月私試如漢生制

筭學 金制凡司天臺學生女直二十六人漢人五十人聽官民家年十五以上三十以下試補又三年一次選草澤人試補其試之制以宣明曆試推步及婚書地理新書試合婚安葬並易筮法六壬課三命五星之術

醫學 金制凡醫學十科大興府學生三十人餘京府二十人散府節鎮十六人防禦州十人每月試疑難以所對優劣加懲勸三年一次試諸太醫雖不係學生亦聽試補

小學 國子學及女直國子學內皆設之

元太宗六年設國子總教及提學官以馮志常爲國子學總教命侍臣子弟十八人入學

此元置學之始也

世祖至元六年七月癸酉立國子學

七年命侍臣子弟十有一人入學以長者四人從許衡童子七人從王恂至二十四年立國子學而定其制設博士通掌學事分教三齋生員講授經旨究正音訓上嚴教導之術下考肄習之業復設助教同掌學事而專守一齋正錄申明規矩督習課業凡讀書必先孝經小學論語孟子大學中庸次及詩書禮記周禮春秋易博士助教親授句讀音訓正錄伴讀以其次傳習之講說則依所讀之序正錄伴讀亦以此而傳習之次日抽籤令諸生復說其功課對屬詩章經解史評則博士出題生員具藁先呈助教俟博士既定始錄附課簿以憑考校許衡又著諸生入學雜儀及日用節目

不忽木與同舍生堅童太答禿魯等請廣學制疏略曰堯舜禹湯文

武之世莫不有學故其治隆于上俗美于下而爲後世所法降至漢朝亦建學校詔諸生課試補官魏武帝起自北方既定中原增至生員三千儒學以興此歷代皆有學校之證也臣等今復取平南之君建置學校者爲陛下陳之晉武帝嘗平吳矣始起國子學隋文帝嘗滅陳矣俾國子學不隸太常唐高祖嘗滅梁矣詔諸州縣及鄉並令置學及至太宗數幸國學增築學舍至千二百間國學太學四門學亦增生員其書筭各置博士乃至高麗百濟新羅高昌吐蕃諸國酋長亦遣子弟入學國學之內至八千餘人高宗因之遂令國子監領六學一曰國子學二曰太學三曰四門學四曰律學五曰書學六曰筭學各置生徒有差皆承高祖之意也然晉之平吳得戶五十二萬而已隋之滅陳得郡縣五百而已唐之滅梁得戶六十餘萬而已乃其崇重學校已如此况我堂堂大國奄有江嶺之地計亡宋之戶不

下千萬此陛下神功自古未有而非晉隋唐之所敢比也然學校之政尚未全舉臣竊惜之臣等向被聖恩習儒學欽惟聖恩豈不以諸色人仕宦者常多蒙古人仕宦者常少而欲臣等曉識世務以任陛下之使令乎然以學制未定朋從數少譬如責嘉禾于數苗求良驥于數馬臣等恐其不易得也爲今之計如欲人材衆多通習漢法必如古昔徧立學校然後可帝覽之喜

翰林集賢學士程鉅夫奏曰國家自中統建元以來中外臣寮亦時聞表表偉傑者皆自往時故老宿儒薰陶浸灌而然歷時既久以次淪謝邇來晨星寥寥無幾何矣臣不知更十餘年後人物當何如其瑣瑣也而主國論者恬不知怪視學校爲不急謂詩書爲無用不知人才盛衰張本于此

翰林國史院檢閱官袁桷上國學議曰成周國學之制略見于大司

樂其遺禮可法者見于文王世子三代而上詳莫得而聞焉漢武表章六經興太學至後漢爲尤盛唐制微附益之而其制愈加詳密今可考也宋朝承唐之舊而國學之制日壞至于紹興國學愈廢雖名三學而國學非真國子矣夫所謂三舍法者崇寧宣和之弊也至秦檜而復增之月書季考又甚于唐明經帖括之弊唐楊綰嘗曰進士誦當代之文而不通經史明經但記帖括或投牒自舉非虛席待賢之意宋之末造類不出此今科舉旣廢而國學定制深有典學教胄子之意倘得如唐制五經各立博士俾之專治一經互爲問難以盡其義至于當世之要務則略如宋胡瑗立湖學之法如禮樂刑政兵農漕運河渠等事亦朝夕講習庶足以見經濟之實往者朱熹議貢舉制亦欲以經說會粹如詩則鄭氏呂氏王氏歐陽氏書則孔氏蘇氏吳氏葉氏之類先儒用心實欲見之行事自宋末年尊朱熹之學唇腐舌斃止于四書之註故凡刑獄簿書金穀戶口靡密出入皆以爲俗吏而爭鄙棄清談危坐卒至國亡而莫可救近者江南學校教法止于四書鬚鬣諸生相師成風字義精熟靡有遺忘一有詰難則茫然不能以對又近于宋世之末尚甚者知其學之不能通也于是大言以蓋之議禮止于誠敬言樂止于中和其不涉史者謂自漢而下皆霸道其不能詞章也謂之玩物喪志又以昔之大臣見于行事者皆本于節用而愛人之一語功業之成何所不可殊不知通達之深者必悉天下之利害灌膏養根非終于六經之格言不可也又古者教法春夏學干戈秋冬學羽籥若射御書數皆得謂之學非若今所謂四書而止儒者博而寡要故世當以儒詬誚由國學而化成天下將見儒者之用不可勝盡儒何能以病于世哉

二十五年十一月修國子監以居胄子

成宗元貞元年三月增置蒙古學正以各道肅政廉訪司領之。是年冬始定國子生蒙古色目漢人三歲各貢一人。

武宗至大四年閏七月詔定國子生額為三百人仍增陪堂生二十人通一經以次補件讀著為式。是年復立國子學試貢法蒙古授官六品色目正七品漢人從七品試蒙古生之法宜從寬色目生宜稍加密漢人生則全用科場之制。

仁宗延祐元年四月立回回國子監。

二年用集賢學士趙孟頫禮部尚書元明善等所議國子學貢試之法更定之。

一曰陞齋等第六齋東西相向下兩齋左曰游藝右曰依仁凡誦書講說小學屬對者隸焉中兩齋左曰據德右曰志道講說四書課肄詩律者隸焉上兩齋左曰時習右曰日新講說易詩書春秋習明經

義等程文者隸焉每齋員數不等每季考其所習經書課業及不違規矩者以次遞陞。

二曰私試規矩漢人驗日新時習兩齋蒙古色目驗志道據德兩齋實歷克貢漢人

月試辭理俱優為上等準分理優詞平者為中等準半分每歲通計其年積分至八分以上者陞充高等生員以四十名為額內蒙古色目各十名漢人二十名歲終試貢。

三曰黜罰科條應私試積分生員其有不事課業及一切違戾規矩者初罰一分再犯罰二分三犯除名應已補高寺生員其有違戾規矩者初犯殿試一年再犯除名學正錄歲終通行考校應在學生員除蒙古色目別議外其餘漢人生員三年不能通一經及不肯勤學者勒令出學其餘責罰並依舊規。

集賢修撰虞集上學校議略曰師道立則善人多今天下教官猥以



資格注授強加之諸生之上而名之曰師有司生徒皆莫之信如此而望師道之立可乎爲今之計莫若使守令自求經名行修之士身師尊之以求其德化之及庶乎有所觀感也其次則操履近正確守經義師說爲衆所服者又其次則取鄉貢至京師罷歸者其議論文藝猶足以動人非若泛泛莫知根柢者及爲考官謂同列曰聖經深遠非一人之見可盡不必先有主意若先有主意則求賢之心狹而差自此始矣同列服其言故所取多得人焉

泰定帝三年更積分而爲貢舉並依世祖舊制

文宗天曆二年勅增作讀員數初二十人歲貢二人後于大德七年定四十人歲貢六人至大四年定四十人歲貢四人延祐二年歲貢八人爲淹滯既額設四十名且充部令史者四人路教授者四人是後又命所貢生員每大比選士與天下士同試于禮部策于殿廷又增置備榜而加選擇焉

書學 世祖至元九年七月和禮霍孫奏蒙古字已設國子學而漢官子弟未有學者及官府移文猶有畏吾字詔自今詔令並以蒙古字行仍遣百官子弟入學

算學 世祖至元八年六月令蒙古官子弟好學兼習算學

明初都金陵以元集慶路儒學爲國子學

改建國學于雞鳴山之陽十五年作先師孔子廟改國子學爲監

國初歲報監生冊卽周人學士之版也每歲終總一歲諸生之數分舉貢官例舊管新收開除實在之目具冊以獻于天府蓋人材興替于是驗焉祖宗時未有入貲之例而在監者輒將萬人今開例極廣而班生落落歲終出入不滿千人是不求其故耶

太祖洪武三年詔設科取士自是國子生得就京闈鄉試

王氏曰按太祖設科取士既許國子生就試而國子或得舉者多或在高等則又以爲喜豈私于國子哉蓋亦敦崇教始開勵學途其汲汲者如是也

成祖末樂二年始以北平府學爲北京國子監今太學是也里曰崇教坊在都城東北隅卽元國學遺址

仁宗洪熙元年北京諸司皆稱行在末樂六年定都于北乃革行在止稱國子監

王氏曰四代之學虞商貴在郊夏周貴在國在國以敦禮樂教化之原在郊以遠朝雜市紛之劇高皇帝卜太學于南都之雞鳴山去朝市且十里今太學雖沿元址其去朝市亦如之不越都闈而負隔囂會列聖所取蓋有深意

四裔遣子入學

國初高麗遣金濤等四人來入太學 洪武二十一年雲南囉囉上遣其二子入監讀書 二十二年西南諸土官皆遣子入監日本國秦遣其官生來學 二十五年琉球國遣其子及陪臣之子日孜每等至帝命工部給羅絹爲秋衣給鋪蓋從人亦給衣焉向慕文教琉球于諸裔爲最篤國家待之亦爲最優令其授姓命名亦如中夏非復初遣之比我國人文之化于是益河徽矣太學前有交趾號舍蓋成祖設北監以來所以處交趾官生者乃知當時各裔遣子入學之盛而今文案陳述不可具考

勲戚入學

太學初設大本堂卽命功臣子弟徐允恭等入從東宮親王講讀尋又令公侯伯初承襲年幼者鄭國公常茂等入大本堂讀書 十六年上慮武臣子弟頑梗繩愆廳不能朴罰命曹國公李文忠兼領監事以蒞

續文獻通考卷之十一
成化十年令公侯駙馬伯初襲授者送監讀書習禮祭酒一依學
規教之不率者奏聞嘉靖六年令于國子監博士助教等或見在部
及附近教官內推選行止端莊年力英銳文學優長義理精明的一員
着在駙馬府教讀經書習字使其知忠孝仁義之訓及通曉禮樂名物
古今事類庶幾德器有成時金克厚陞禮部儀祭司主事職銜專在駙
馬都尉謝詔府教習經書十九年禮部覆國子監司業兼司經局校
書王同祖奏自今公侯伯子弟年十八以上者該部具名上請送監讀
書習禮本監仍每名選撥友伴監生二名與之講學相資薰陶規勸每
五日一赴監俟諸生立班定友伴引至階下恭揖而退侍立兩旁以觀
揖讓周旋之節俟堂儀畢赴廟授書講習其有不率教者憑本監堂
加奏聞區處

太學出身

二祖篤建二雍紹隆周室列聖光嗣丕贊前徽一代人才之盛近古莫
並焉太學諸生槩列四途曰貢曰舉曰廕曰例貢若師達等舉若夏原
吉等廕若張敷華例若羅圯或以行義或以風節或以功業或以理學
皆卓然特出著名當時不特撥巍科躋廡仕徧于中外已也

初太學生皆貢自郡邑選鄉學之尤者充之其後乃有各省鄉試舉
人時進士之科未盛內而臺諫外而藩臬率以授諸太學生之成材者
自制科既重太學生成材者與天下賢士盡入蒐羅于是內外要重
之司皆歸進士而貢舉所稱監生者則有遺賢銓人高等不過授以
省府幕僚州正郡佐而臺諫藩臬則必待其歷官有譽而後得之然
亦千百而什一耳往年江陵張相當國常力主三途並用之議僅一
行焉而輒不能繼豈太學之英能盡錄于甲科耶

太祖洪武二年擇國子生試用之巡行列郡舉其職者竣事復命卽擢

行省左右叅政各道按察司僉事及知府等官。七年擇博士趙俶等所教國子生年少聰明者李擴等入文華武英二堂說書謂之小秀才。甚見寵遇。明年以擴等爲監察御史。十九年五月上以天下郡縣多吏弊民蠹皆由雜流得爲牧民官乃命祭酒擇監生千餘人送吏部除授知州知縣等職。二十四年選監生練達政體者得方文等六百三十九人命行御史事稽覈天下百司案牘。三十五年成祖卽位三月擢監生丁琰姚山李晟九月擢王孚等九人俱爲給事中。成祖末樂九年春進士鍾英張習張式馬信邵聰改翰林院庶吉士初五人者由監生選入翰林習譯書至是登科故有此改以後爲例。十年十六人十三年三十二人。憲宗成化三年擢監生呂憲爲中書舍人憲故學士原之子以廕補也是後官生命于中書舍人習字出身以爲常。

自正統以來舉貢監生無復有徑授臺諫及藩臬長貳者嘉靖八年廷議復申三途並用之例于是以舉人監生孫翥爲給事中舉人監生阮薇歲貢監生張澍爲監察御史。

祠祭

宋度宗咸淳三年帝釋菜于孔子以顏淵曾參孔伋孟軻配列邵雍司馬光從祀又陞顯孫師于十哲追封雍新安伯講官監官三學長貳及諸生推恩有差。

遼太祖神冊元年春立子倍爲皇太子問侍臣曰受命之君當事天敬神有大功德者朕欲祀之何先皆以佛對太祖曰佛非中國教皇太子對曰孔子大聖萬世所尊祀宜先太祖太悅卽建孔子廟詔皇太子春秋釋奠。

史稱遼之義宗可謂盛矣其始慕秦伯之賢而爲讓國之謀終疾

陳恒之惡而為請討之舉李從珂弒主志趣之卓蓋已見于早歲

先祀孔子之言終遼之世聖賢繼統皆其子孫探德之報昭然矣

金熙宗天會十五年立孔子廟于上京

天眷三年詔求孔子後加四十九代孫璠承奉郎襲封衍聖公奉祀事

皇統元年親祭孔子廟北面再拜

世宗大定元年以顏歆從祀廟庭

十四年國子監言歲春秋仲月上丁日設奠于文宣主釋奠器物行禮

次序合行下詳定夫兗國公親承教者也鄒國公功狀聖教者也當于

先聖像左右列之今孟子以燕服在後堂宣聖像側還虛一位禮宜遷

孟子像于宣聖右與顏子相對改塑冠冕裝飾法服一遵舊制禮官乃

叅酌唐開元禮定擬釋奠儀數

十六年詔立兗州學闕里廟宅子孫年十三以上入學者不限數

二十年十二月特授襲封衍聖公孔總兗州曲阜令封爵如故

章宗承安四年詔刺史州郡無宣聖廟像者並增修之

五年三月諭有司進士名有犯孔子諱者避之仍著為令

元太祖初平燕京以金樞密院為宣聖廟

內翰王文康公鶚元初自保定應聘北行時故人馬雲漢以宣聖畫

像為贈既達北庭值秋公奏行釋奠禮世祖悅即命舉其事公為祝

文行三獻禮禮畢進胙于上上飲福熟其胙命左右均霑所賜自是

春秋二仲歲以為常蓋元之所以尊重師道者實公有以啓之

世祖中統二年詔宣聖廟有司歲時致祭月朔釋奠禁官員使臣軍馬

毋得侵擾褻瀆違者加罪八月命開平守臣釋奠于宣聖廟

十三年以孔子五十三世孫曲阜縣尹孔治兼權主祀事

十九年以宋衍聖公孔洙為國子祭酒兼提舉浙東學校

王氏曰孔子後自宋南渡初其四十八代孫端友子玠寓衢州元
既平宋擬所立或言孔氏子孫寓衢者乃其宗子召洙赴闕洙遜
于居曲阜者帝曰寧違榮而不違親真聖人後也故有是命

瓊山丘氏曰按寧王所著通鑑博論于至元十八年有云帝信桑門
之惑盡焚中國道藏闢儒道二教爲外學貶孔子爲中賢尊桑門爲
正道又爲世祖斷云聽妖僧祥逼之誘作妖書以毀昊天上帝貶孔
子爲邪道擬爲中賢不足稱聖及考元史止于是年焚毀道書而不
見所謂貶孔子之實惟成宗本紀世祖正月崩成宗卽位是年秋七
月卽詔中外崇奉孔子夫孔子自唐宋以來天下學校通祀之已非
一日又何待今日始詔中外崇奉之哉噫當時必有所施行如博論
所云者元史臣爲世祖諱故略去之嗚呼孔子既沒之後世主未敢
有異論者使誠有是事則世祖之罪浮于始皇矣疑以傳疑史家通

例也故因所疑而書之以俟知者

大德中給大都文宣廟曲阜林廟洒掃戶以尚珍署田五十頃供歲祀
十一年七月制加孔子號曰大成制曰先孔子而聖者非孔子無以明
後孔子而聖者非孔子無以法所謂祖述堯舜憲章文武儀範百王師
表萬世者也可加大成至聖文宣王遣使闕里祀以太牢嗚呼父子之
親君臣之義求惟聖教之尊天地之大日月之明奚罄各言之妙尚資
神化祚我皇元

仁宗卽位遣宦者李邦寧釋奠于孔子邦寧既受命行禮方就位忽大
風起殿上及兩廡燭盡滅燭臺底鐵罇入地尺許不可拔邦寧竦息伏
地諸執事者皆伏良久風息乃成禮

胡粹中曰祭祀所以交神明故將有事焉必先射以觀德及期則
齋以告虔戒以告潔刑罪喪疾之人不敢以與執役况敢主其祭

乎。邦寧闢腐餘醜其爲刑疾孰甚焉而使之釋奠曾謂孔子不如
林放乎。神不享非禮。大風之變吾先聖豈可誣哉。仁宗宜不知此。
李孟以平章兼領國學而致其以非禮事先聖罪益不容揜矣。
皇慶二年六月以宋儒周敦頤程顥程頤張載邵雍司馬光朱熹張栻
呂祖謙及故中書左丞許衡從祀孔子廟庭。

瓊山丘氏曰。自唐以諸儒從祀孔子廟庭後世因之。必其人于孔子
之道有發明衛翼之功。然後與焉。非徒崇德亦以報功也。夫孔子有
大功于天地。以其刪述六經也。世之儒者必于是六經躬而行之。闡
而明之。然後得以與于從祀之列。苟棄其書而不用。背其道而逆施。
陪食聖人廟庭之間。其心安乎。春秋一經關係尤大。宋王安石棄春
秋之經者也。一時羣小附和。躡躑之于從祀之列。其後公論卒足禡
而去之。元之許衡則背春秋之經者也。或曰許子豈可輕訾乎哉。曰

爲一世計則許子固不爲無功矣。爲萬世計則許子豈得無罪哉。
許約曰。自唐祀夫子。配以顏子。至宋陞孟子與顏子並配。然當時未
知道統之傳也。自伊洛之學興。性理之說明。始以顏曾思孟並列于
夫子之左。蓋得夫子之傳者顏曾子思也。得曾思之傳者孟子也。故
江南諸路學廟皆以四子並配。以子張居七十二之首。自兩廡升于
十哲。補曾子之闕。此當因而不當革者也。今京師學廟與河北諸路
府學。並循亡金之舊。左顏右孟。與夫子並居南面。有是理哉。孟子學
于子思。子思學于曾子。是知孟子乃曾子門人之弟子。曾子乃孟子
師之師也。今屈曾子于從祀之中。降子思于兩廡之末。師之師不過
一籩一豆。門人弟子牲牢幣帛。一與先聖等。又豈有是理哉。况今天
下一家。豈容南面之禮各異。或謂學校所以明人倫。路點皆父也。回
參皆子也。子先父食。于理安乎。竊以爲不然。廟學乃國家通祀。猶朝

廷之禮也。父爲庶僚子爲宰職各以其德與勳也。如遇會殿廷班列則父雖尊安能超于子之上哉。蓋抑私親而昭公道尊道統以崇正學乃所以明人倫也。如今序傳道之配使顏曾思孟並列于夫子之左。虛其右者以避古者神位之方。自兩廡升子張于十哲以補曾子之闕。不惟先儒師弟之禮不廢。使南北無二制。天下無異禮。亦可以見我朝明道統得禮之中。足以垂世無窮矣。

延祐六年追封宋儒周敦頤爲道國公。是年封遠瑗爲內黃侯。從祀孔子。

文宗至順元年加孔子父齊國公叔梁紇爲啓聖王母魯國太夫人。顏爲啓聖王夫人。時四配皆加贈。又河南伯程顥加豫國公。伊陽伯程頤加洛國公。

三年正月封孔子妻鄒國夫人。開官氏爲大成至聖文宣王夫人。追

封孟子父爲鄒國公。母爲鄒國宣獻夫人。二月詔修曲阜宣聖廟。先是開官夫人神座生木芍藥一本。見者異之。而修廟令下。五月追封顏子父顏無繇爲杞國公。謚文裕。母齊姜氏。杞國夫人謚端獻。妻戴氏。充國夫人謚貞素。

順帝至正十九年江浙行省請楊時李侗胡安國蔡沆龔德秀五人從祀。

二十二年禮部定擬五先生封爵謚號。俱贈太師。楊時追封吳國公。李侗追封越國公。胡安國追封楚國公。蔡沆追封建國公。龔德秀追封福國公。是年追謚朱熹父松爲獻靖。改封熹爲齊國公。

明

凡立學必舉先師之祀。瞽宗在學之典可考也。漢世以前樂師經師習其道則祀其人。蓋未有定祀。東京雖以聖師禮周孔。而朱始有特廟也。

廟祀孔子于學自唐始。夫孔子修六經扶五教終古所宗承歷代嚴禋典制未稱。明朝建雍作廟昭揭兩都崇祀儀章光布寰宇。禮宗正名秩禮先師位號益顯以隆。

王氏曰按後魏太和十三年始立孔子廟于京師。唐高祖武德二年于國子監立周公孔子廟各一。以四時致祭。貞觀二年從左僕射房玄齡議停周公祭。陞夫子爲先聖專祀焉。歷代因之。元置宣聖廟于燕京舊樞密院地。明太祖初平江淮卽詣學謁孔子後建學金陵作先師廟遂親行釋菜之禮。每歲春秋上丁則降御香遣官致祭。列聖以來視學釋奠率敦懿典。至世宗獨再舉焉。二丁非輔弼大臣不遣。故廟址雖循元舊而制度之崇典禮之密則非前代所能及。

廟制

明初制以春秋上丁皇帝御奉天殿傳制遣大臣以太牢祭。至聖先師于太學。南京遺祭酒禮三獻樂六奏文舞六佾。司府州縣衛學名提調官行事。用少牢禮樂如太學。樂不能備則已。京府及附府縣行釋菜禮。殿中先師南向復聖顏子宗聖曾子述聖子思亞聖孟子配享。東西相向先賢閔損冉耕冉雍宰予端木賜冉求仲由言偃卜商顓孫師十哲從祀。亦東西相向。兩廡從祀先賢澹臺滅明宓不齊原憲公冶長南宮适高柴漆雕開樊須司馬耕公西赤有若琴張申張陳亢巫馬施梁鱣公皙哀商瞿冉孺顏辛伯虔曹卹冉季公孫龍漆雕徒父顏高商澤襄駟赤任不齊石作蜀公良孺公夏首公肩定后處鄔單奚容蒧罕父黑顏祖榮旂秦祖左人郢句井彊鄭國公祖句茲原亢縣成廉潔燕伋叔仲會顏之僕邾異樂欬公西輿如狄黑孔忠公西蒧步叔乘施之常秦非顏噲先儒左丘明公羊高穀梁赤伏勝高堂生孔安國毛萇董仲舒后

蒼杜子春王通韓愈胡瑗周惇頤程顥歐陽修邵雍張載司馬光程頤
楊時胡安國朱熹張栻陸九淵呂祖謙蔡沉真德秀許衡九十一人
是日子夜先祭啓聖公孔氏用少牢先賢顏無繇曾點孔鯉孟孫氏左
右配享兩廡先儒程珦朱松蔡元定從祀

國子司業朱濂上孔子廟堂議曰世之言禮者咸取法于孔子不以
古之禮祀孔子褻祀也褻祀不敬不敬則無福奈何今之人與古異
也古者主人西面几筵在西也漢章帝幸魯祠孔子帝西面再拜開
元禮先聖東向先師南向三獻官西向猶古意也今襲開元二十七
年之制遷神南而非神道尚右之義矣古者木主棲神天子諸侯廟
皆有主大夫束帛士結茅爲叢無像設之事開元禮設先聖神座于
堂上兩楹間先聖東北皆莞席尚掃地而祭也今因開元八年之制
博士而肖像焉失神而明之之義矣古者灌鬯炳蕭求神于陰陽

今用熏薌代之非簡乎古者朝覲會同郊廟祭饗皆設庭燎司炬共
之火師監之示嚴敬也今以秉炬當之非賈乎古之有道有德者使
教焉死則以爲樂祖祭于瞽宗謂之先師若漢禮有高堂生樂有制
氏詩有毛公書有伏生也凡始立學者必釋奠于先聖先師釋奠必
有合謂國無先聖先師則所釋奠者當與鄰國合若唐虞有夔伯夷
周有周公魯有孔子則不合也當是時學者各祭其先師非其師弗
學非其學弗祭學校旣廢天下莫知所師孔子集羣聖之大成顏曾
思孟實傳其道尊之以爲先聖先師而通祀于天下固宜若七十二
子止于國學設之庶幾弗悖禮意開元禮國學祀先聖孔子以顏子
等七十二賢配諸州惟配顏子今以荀况之言性惡楊雄之事王莽
王弼之宗莊老賈逵之忽細行杜預之建短喪馬融之黨附勢家亦
廟其中吾不知其何說也古者立學專以明倫子雖齊聖不先父食

久矣故禹不先鯨湯不先契文王不先不窟朱祖帝乙鄭祖厲王猶尚祖也今回參伋坐享堂上而其父列食于廡間顛倒彛倫莫此為甚吾不知其何說也古者士見師以菜為贄故始入學者必釋菜以禮其先師其學官時祭皆釋奠今專用春秋非矣釋奠有樂無尸釋菜無樂是二釋之重輕以樂有無也今襲用魏漢律所製大晟樂乃先儒以為亂世之音可乎哉古者釋奠釋菜名義雖存而儀注皆不可考開元禮彷彿儀禮饋食篇節文為詳所謂三獻獻後各飲福即尸酢主人主婦及賓之義也今憚其煩惟初獻得行之可乎哉他如廟制之非宜冕服之無章而用雜乎雅俗升降昧乎左右此類甚多雖更僕不可盡若乃建安熙氏欲以伏羲為道統之宗神農黃帝堯舜禹湯文武次而列焉臯陶伊尹太公周公暨稷契夷益傳說箕子皆天子公卿之師式宜秩祀天子之樂若孔子實兼祖述憲章之任

其為通祀則自天子下達苟如其言則道統益尊三皇不汨于醫師太公不辱于武夫矣昔周立四代之學學有先聖虞庠以舜夏學以禹殷學以湯東膠以文王復各取當時左右四聖成其德業者為之先師以配享焉此固天子立學之法也

時令進士釋褐行釋菜禮更定釋奠祭器禮物擇監生及文職大臣子弟在學校者充樂舞生又從行人司副楊砥議罷楊雄從祀進董仲舒配享

英宗正統二年進宋儒胡安國蔡沈真德秀從祀

世宗嘉靖九年帝用張孚敬等議釐正祀典撤去塑像改大成至聖文宣王為至聖先師孔子神位四配十哲凡及門弟子皆止稱先賢某子神位左丘明以下皆稱先儒某子神位申黨申枏二人疑以據論語為證乃存枏去黨而公伯寮秦丹顏何荀况戴聖劉向賈逵馬融何休王

肅王弼杜預吳澄十三人俱罷從祀。林放蘧瑗鄭玄鄭衆盧植服虔范
甯七人令各祀于其鄉。后蒼王通歐陽修胡瑗四人增入從祀。用學士
程敏政之言也。尋用行人薛侃議增陸九淵。于是東廡從祀四十七位。
西廡從祀四十四位。凡舊封公侯伯爵盡皆革去。仍改大成殿爲先師
廟。大成門爲廟門。時徐階疏辨改號易像爲非宜。帝怒切責之。旣而復
疏曰。聖謨洋洋非臣所能窺測。上謂其諛佞。謫延平推官。且立佞人碑。
慈利縣學教諭蔣明于宣德十年疏言。從祀元儒吳澄命同大學士
楊士奇等議。議曰。我國家崇儒重道。大明四書五經及性理之旨。凡
澄所言皆見采錄。以惠學者。蓋澄問學之功。朱熹以來莫或過之。而
從祀諸賢自荀况下至范甯。語其事功皆未及澄。今若升澄從祀。孔
子廟庭列諸許衡之次。允愜斯文之公議。昭國家之盛典矣。
學士程敏政考正祀典疏。以左丘明等二十二人從祀孔子廟庭。蓋

貞觀時聖學不明。議者無識。拘于註疏。謂釋奠先師。如詩有毛公禮
有高堂生。書有伏生之類。遂以專門訓詁之學。爲得聖道之傳。而并
及馬融等行之。至今誠不可不考其行之得失。與議之可否。乞將戴
聖馬達賈融劉向何休王肅王弼杜預八人褫爵罷祀。鄭衆盧植鄭
玄服虔范甯五人各祀于其鄉。后蒼在漢初說禮數萬言。戴聖等受
其業。蓋今禮記之書非后氏則不復傳于後矣。乞加封爵與左丘明
等一體從祀。則僞儒免欺世之名。賢者受專門之祀。而情文兩得矣。
一孔子弟子見于家語。自顏回而下七十六人。家語之書出于孔氏。
當得其實。而司馬遷史記所載多公伯寮冉秦顏何三人。文翁成都
廟堂所畫又多蘧瑗林放申枨三人。先儒謂後世以所見增益。殆未
可據。臣考宋邢昺論語註疏。申枨孔子弟子。在家語作申續。史記作
申黨。其實一人也。且公伯寮愬季路以沮孔子乃聖門之蝨。騰而孔

子稱瑗爲夫子決非及門之士林放雖嘗問禮然家語史記邢昺註疏朱子集註俱不載諸弟子之列秦冉顏何疑亦爲字畫相近之誤如申黨申枏者但不可考耳臣愚以爲申枏申黨位號宜存其一公伯寮秦冉顏何蘧瑗林放五人旣不載于家語七十子之數宜罷其祀若瑗放二人不可無祀則乞祀瑗于衛祀放于魯或附祭于本處鄉賢祠仍其舊爵以見優從賢者之意亦庶乎名實相符而不舛于禮也洪武二十九年行人司司副楊砥建議請黜楊雄進董仲舒太祖高皇帝嘉納其言而行之臣竊以爲漢儒莫若董仲舒唐儒莫若韓愈而尚有可議者一人文中子王通是也通之言行先儒之語已多大約以爲僭經而不得比于董韓云爾臣請斷之以程朱之說程子曰王通隱德君子也論其粹處殆非荀楊所及朱子曰文中子論治體處高似仲舒而本領不及爽似仲舒而純不及又曰韓子原道

諸篇若非通所及者然終不免于文士之習利達之求若覽古今之變措諸事業恐未若通之精到懇惻而有條理也至于河汾師道之立出于魏晉佛老之餘迨今人以爲盛則通固豪傑之士也又按宋儒自周子以下九人同列從祀而尚有可議者一人安定胡瑗是也瑗之言行先儒之論已詳大約以爲少著述而不得比于濂洛云爾亦請斷之以程朱之說程子曰宜建尊賢堂以延天下道德之士如胡瑗張載邵雍使學者得以矜式朱子小學書亦備載瑗事以爲百世之法臣以爲自秦漢以來師道之立未有過瑗者况宋端平二年議增十賢從祀以瑗爲首若以瑗爲無著述之功則元之許衡亦無著述但其身教之懿與瑗相望誠有不可偏廢者若通瑗兩人之師道百世如新得加封爵使與衡得並列祀于學官最得禮意是年禮科右給事中張九功奏言孔子之道大同天地從祀諸賢豈容或苟如

荀况馬融王弼楊雄皆在所當黜今之儒臣學士薛瑄在所當入命禮部會議于是尚書周經等僉言楊雄已黜于洪武而薛瑄嘗與元儒劉因並欲從祀以大學士楊廷和謂其無所著述而止自餘皆有羽翼聖經之功宜仍舊從祀

國子監祭酒謝鐸奏正祀典以端教化之本龜山先生楊時程門高弟伊洛正傳息邪放淫以承孟氏不愧南軒所稱繼往開來吾道南矣實演晦翁之派雖其晚節一出不克盡從其言而新經之闢誠足以衛吾道又若臨川郡公吳澄著述雖不為不多行檢則不無可議生長于淳祐貢舉于咸淳受宋之恩者已如此其久為國子司業為翰林學士迹其所為曾不及洛邑之頑民何敢望首陽之高士昔人謂其專務聖賢之學卓然進退之際不識聖賢之于進退果如是乎乞陞時上祔宋諸賢之位斥澄下從莽大夫之列不惟天下之公論允

愜而于世道教化亦不為無補矣

又奏正祀典以究明倫之實竊惟學校之設所以明人倫也人倫首先于父子子雖齊聖不先父食奈何承訛襲故以顏曾思配享堂上而其父則皆列祀廡下冠履倒置有是理哉為今之計莫若于闕里立廟祀叔梁紇以顏路曾皙孔鯉諸賢配享如先儒熊去非之論庶幾各全其尊而神靈安妥也

大學士張璠于嘉靖九年歷舉前後諸臣之議奏正孔子祀典祀啓聖公及黜諸從祀之未安者上一一行之其議歐陽修當從祀曰臣按歐陽修乃有宋一代人物未與從祀嘗觀其所著本論實有翊衛聖道之功

王氏曰按孔子及諸賢封爵先儒亦嘗疑之啓聖立祠顏路曾皙孔鯉改祀議亦發于前代而未之能行洪武中宋濂解縉始復起

其說厥後程謝諸臣相繼闡明之。洪武二十九年，黜楊雄，進仲舒。宣德十年，增吳澄。正統二年，增胡安國、蔡沉、真德秀。弘治八年，增楊時。嘉靖九年，用廷議，乃正先師位號，祀典肇祀啓聖公，而諸儒從祀。增后蒼、王通、歐陽修、胡瑗、陸九淵。其當罷祀及祀于鄉者，一如宋濂、程敏政之言。給事中魏時亮請錄真儒，以彰道化。舉薛瑄、陳獻章、王守仁，均得聖學真傳，宜從祀孔廟。

聖裔 附四氏裔

孔子周靈王二十年己酉當魯襄公二十一年十月庚子生。哀公十六年卒，年七十四。其先宋人也。周成王封微子啓于宋，以奉湯祀。啓弟仲衍生宋公稽，稽生丁公申，申生共，共生弗父何，自何而下世爲宋大夫。何生宋父周，周生世父勝，勝生正考父，考父生孔父嘉，其後奔魯，遂爲

魯人。嘉生木金父，木金父生畢夷父，畢夷父生孔防叔，防叔生伯夏，伯夏生紇，字叔梁，爲陬邑大夫，娶顏氏女，徵在禱于尼丘，生孔子，因名曰丘，字仲尼。

二代鯉，字伯魚，孔子之子，學通儒術。魯哀公以幣召之，稱疾不行。年五十先孔子卒。

三代伋，鯉之子，字子思，著書四十七篇，曰中庸，教授弟子。孟軻之徒數百人，年六十二。

四代伋之孫，字子上，請所習于子思，通羣書，又善兵法。

九代鮒，字子魚，一字申，著孔叢子。十三代霸，字次孺，幼有奇才。漢昭帝時爲博士，宣帝時爲太中大夫，選任皇太子司經，遷詹事，爲高密相。元帝卽位，拜爵關內侯，號褒成君。奉夫子祀，年七十二卒，謚烈。

十六代均房子字長平初名莽改今名好學有大才襲封關內侯平帝
更封魯國褒成侯追謚夫子爲褒成宣尼公王莽篡位拜太尉辭疾還
鄉年八十一

十八代損字君益和帝時徙封褒亭侯

二十一代羨字子餘魏文帝黃初元年拜議郎封宗聖侯

二十二震羨子字伯起晉武帝泰始三年改封奉聖亭侯拜太常卿黃
門侍郎

二十六代鮮字鮮之恢廓有大度好學善誘誨宋文帝時襲封聖亭侯
後改封崇聖侯

三十代渠襲封崇聖侯改封恭聖侯後周靜帝進封孔子爲鄒國公立
後因改封鄒國公

三十五代遂之字藏唐明皇時襲封褒聖公開元時追謚孔子爲文

宣王因改遂之爲文宣公

四十六代聖祐宋天禧間以光祿寺丞襲封文宣公年三十五卒無嗣
以堂弟宗願承襲與聖祐共爲一代宗願者宜次子延澤子字子莊博
涉書史嘉祐中用祖無擇之言改封爲衍聖公

五十二代之厚元孝子也贈魯郡侯自元措傳襲以來嫡長乃元孝元
孝生之厚之厚生浣三世讓衍聖公爵不取誠至德也

五十三代洙襲封衍聖公常添差通判平江府浣字自新追封魯郡
侯生思晦治字世安元壬子年代父充曲阜令權主祀事貞元中襲
封衍聖公

右闕里譜系元豐八年四十六代孫宗翰始以舊譜鈔板紹興二年
四十八代孫端朝逃難南奔平生所資皆失之獨此譜山中入得之
轉以見歸因爲序錄紹興五年洪興祖守廣德軍刊于郡齋景定三

闕里志作
宗愿

年五十一代孫應得令台州太守時差添廣德軍判又附入紹興五年以後至景定三年云

自五十四代以後罷衢州襲封

五十四代思晦字明道元仁宗延祐三年襲封衍聖公鑄四品印泰定三年改從三品印

五代時孔末之後欲以偽亂真宣聖子孫被其殘害幾盡至是其裔復欲冒稱宣後思晦以爲不早辨則真偽久益不可明彼與我不共戴天乃列于族與共拜殿庭可乎遂會族人稽故典斥之既又重刻宗譜于石而孔氏族裔益明矣

宋元聖裔

宋理宗寶慶元年克平山東以孔子五十一世孫元用權襲封衍聖公仙源令二年改濟州通判兼京東西路安撫使主管機宜文字

元太祖時木華黎統諸道兵至山東承制封拜以元用權襲封衍聖公世襲曲阜令給降衍聖公印乙酉年元用從木華黎征益都以其子之全權襲封衍聖公曲阜令

太宗癸巳年元措自汴還仍襲封衍聖公之全止充曲阜令

憲宗壬子年令五十三代孫治補父之全缺充曲阜管民長官

世祖中統元年改治曲阜令四年令權祀事

成宗元貞元年治赴闕朝見特授中議大夫襲封衍聖公爵一品散官四品給四品俸

明聖裔

五十五代克堅字景夫至元元年襲封衍聖公六年進階中奉大夫從二品賜銀印召爲同知太常禮儀院以子希學襲公爵拜中臺治書侍御史改山東道肅政廉訪使起爲集賢直學士改禮部尚書知貢舉遷

陝西行臺御史改國子祭酒謝病歸召爲資善大夫集賢學士再起山東廉訪使俱不赴洪武元年召至京師待以賓禮而不名俾食公祿不視事

五十六代希學字士行後至元十五年克堅拜同知太常禮儀院以希學襲爵兼秘書卿洪武元年詔襲封改賜階資善大夫正二品別給銀印每入朝班亞上相予誥還其祭田備禮器樂器樂舞置屬官管勺典籍司樂各一員每至京中使慰勞館饋殊等

五十七代納字言伯洪武十七年襲封衍聖公詔不稱資善大夫以玉軸誥文給之時革丞相每入朝令刻文臣首賜一品金織衣誥命白玉軸每入覲給符乘傳

五十九代彥縉字朝文十歲襲封衍聖公每入朝仍刻文臣首洪熙元年賜第東安門北景皇帝視學召入觀禮賜金廂犀帶大紅鶴袍三年

來朝復賜三臺銀印織金麒麟服白玉束帶卒年五十五諭祭治喪葬賻卹優厚

六十一代弘緒字以敬景泰六年年八歲襲封衍聖公賜鶴袍玉帶如例以其軀小去二膀俾藏之以爲榮又範金爲圖書以賜之其文曰謹禮崇德天順元年入朝見便殿上握手置膝上改賜大第成化中坐奸淫殺人法當斬詔以宣聖故削爵爲民弘治中復冠帶

弘泰字以和成化十七年代兄弘緒封衍聖公憲宗朝加先聖廟祭禮樂孝廟初幸太學俱詔入觀禮賜襲冠帶如例又改賜第于慶壽寺之北

六十二代聞韶字知德弘緒子也弘泰卒法當聞韶襲以弘治十六年封衍聖公上賜麒麟服白玉帶黃金盆正德年幸太學召入觀禮賜晏冠服靴帶寶鈔如故事嘉靖初上兩幸大學召賜亦如之

六十四代尚賢字象之嘉靖三十五年以父貞幹卒京師卽令襲爵時方穉齒勅山東撫按諭其族人謹視之不爾治以重罪

六十五代胤椿尚賢子隆慶元年吏部覆郭諫臣奏衍聖公或遇親喪仍令守制其襲封一事所司代爲奏請令其守護印信候服滿起送承襲服內免其入賀

聖裔居溫考

宋淳祐中于溫之府城西南建永嘉書院中奉宣聖燕居像而孔裔居溫不知所自舊考自檜始檜子奕奕子源源子實實子會會子公志公志子師古師古子炳炳子貴敬貴敬子潼孫潼孫子文升至洪武中平陽孔克表以博學篤行薦爲翰林修撰則孔子五十五世孫也

世尹博士

明崇厚孔裔極其優渥在曲阜者襲封衍聖公之外復世襲曲阜縣

一人以約束其宗人正德中復以六十二代孫聞禮爲翰林五經博士世襲以奉子思後在衢州者復官其長嫡一人世襲五經博士然皆不使治事蓋不欲以吏議繩聖人之後本朝之崇聖裔過前朝遠矣

按世尹以衍聖公兼者唐文宣公萱兼泗水令昭儉兼曲阜令後唐仁玉兼曲阜令宋延世兼曲阜令聖祐兼知仙源縣事金衍聖公總兼知曲阜縣事元措兼世襲曲阜令元用兼仙源令份宋遙授元仍兼曲阜令

專授者宋昂等三八俱曲阜令又道輔等六人俱知仙源縣令元濟等七人俱曲阜尹明初希範等十八人俱曲阜縣知縣

子思裔正德中以孔子六十二代孫聞禮爲翰林院五經博士奉子思後聞禮卒弟聞詩代聞詩卒聞韶之子貞寧代弘治中以衢州長嫡一八世襲五經博士

顏子裔成化中授翰林院五經博士世襲景泰二年授希惠翰林院五經博士後以不係嫡派罷黜于是授議議生公絃公絃生重德重德生從祖從祖無傳以重禮長子肇先嗣俱襲職重禮未詳所出肇先生嗣慎

曾子裔正德間山東僉事錢宏訪得曾子之後一人于嘉祥深山中未請于朝後竟湮沒嘉靖十二年吏部侍郎顧鼎臣奏准訪求曾氏嫡派得嵩充兄弟以生長南方不樂北徙惟質粹肯行後授質粹翰林院五經博士世襲

孟子裔宋仁宗景祐四年孔道輔守兗州訪孟子後得寧後薦于朝授鄒縣主簿寧生堅德學俱優特授徐州知州明景泰二年授希文翰林院五經博士世襲

朱子婺源人生三子塾塾在皆以廕補官塾生鑑隨季父之紫霞洲明

景泰間詔梃授翰林院五經博士世襲以奉祀事梃生燉燉生學以上世居建安嘉靖三十七年婺源子孫乞如建安例于是復以守婺源祠

幸學

宋理宗景定五年詔郡縣行鄉飲之禮

遼聖宗統和十二年霸州民李在宥年百三十有三賜束帛錦袍銀帶仍復其家十六年六月詔婦人九十者賜物

元順帝至正八年帝臨國子學賜衍聖公銀印陞秩從二品定弟子員出身及省親奔喪制

王氏曰順帝每事驕奢不恤國政而獨于臨太學之事差近人情此由其人欲雖多而天理間有萌動之機耳

明朝南雍初建大駕數臨位置規圖一由淵畫廟學既成復躬行釋菜之禮皮弁執圭再拜而後奠爵仍再拜而退崇祀之重前古莫及焉且

躬御講筵。延禮司成坐講堂。上親爲論說。既諭戒師生。復賜晏竟日。乃返。儒均光寵。未始前聞。其後代遵承踐祚之初。必舉斯典。至世宗獨臨幸。至再秩禮典。教屢渙。天章尤近代所未覩也。

洪武十五年。上謂禮部尚書劉仲質曰。國學新成。朕將釋菜。令諸儒議禮。議者曰。孔子雖聖人臣也。禮宜一奠而再拜。上謂孔子明道德以教後世。豈可以職位論哉。昔周太祖入孔子祠。將拜。左右曰。孔子陪臣。不宜拜。周太祖曰。百世帝王之師。敢不拜乎。遂再拜。朕深嘉其明斷不惑。左右之言。今朕有天下。敬禮百神于先師之禮。宜加尊重。質乃與儒臣定議。上服皮弁服。執圭。詣先師再拜獻爵。後又再拜。易服。詣彝倫堂。祭酒司業博士助教進講。賜坐。侍臣以次坐于東西。講畢。宣諭學官諸生。而還。明日祭酒率學官上表謝恩。上從之。

上幸國子監。謁先師。孔子釋菜禮。以退。御講筵。祭酒吳頤等以次講畢。上謂之曰。中正之道。無踰于儒。上古聖人。不以儒名。而德行實儒。後世儒之名立。雖有儒名。或無其實。孔子生于周末。身儒道。行儒行。立儒教。率天下後世之人。皆欲中正。惜乎魯國君臣無能用之者。當時獨一公父文伯之母。知其賢。責其子之不能從。則一國君臣。可愧矣。卿等爲師表。正當以孔子之道爲教。使諸侯咸趨于正。則朝廷得人矣。

養老

太祖洪武元年。令民七十以上者。許一丁侍養。免其雜泛差役。

五年夏五月。詔中外學官行養老之禮。先是太祖念海內晏安。思化民俗。以復其古。遂命禮部考儀禮及唐宋之制。又采周官屬民讀法之旨。參定。每歲孟春正月。孟冬十月。有司偕學官率士大夫之老者。行之于學宮。其民間里社。以百家爲一會。以糧長或里長主之。百人內以年最長者爲正賓。餘以齒序坐。每季行之于里中。大都皆本于正齒位之說。

而賓興賢能春秋習射亦可通行焉酒舖不許奢靡若讀律令則以刑部所編申明戒諭書兼讀之其武職衙門在內各衛親軍指揮使司及指揮使司凡鎮守司每月朔日亦以大都督府所編戒諭率僚佐讀之制曰可遂詔應天府及直隸府州縣並各布政司府州縣俱舉行之十六年頒行鄉飲酒禮圖式一各處府州縣每歲正月望日十月朔日舉行于學宮除僎賓外衆賓序齒列坐其僚屬則序爵前一日主明倫堂依圖陳設坐次至日主及僚屬司正先詣學遣人速僎賓以下比至執事者報賓至主偕僚屬迎于庠門之外以入主東賓西三讓之揖而後升堂東西相向立贊兩拜畢皆坐僎至介至儀立同既齊至各就位執事者引司正由西階升詣堂中北面立執事者唱僎賓以下皆立各相揖執事舉酒授司正司正曰恭惟朝廷率由舊章敦崇禮教舉行鄉飲非爲飲食凡我長幼各相勸勉爲臣盡忠爲子盡孝長幼有序昆友

弟恭內睦宗族外和鄉里無或廢墜以黍所生讀畢司正遂飲酒以解授執事仍各相揖司正復位及僎賓以下皆拱立行揖禮如揚解儀及讀皆肅而聽之有過之人俱赴正席立聽讀畢執事者舉僎案至賓前次僎次介次主三賓以下次第舉之乃獻賓執事者斟酒以授主主受爵詣賓前至于席稍退贊兩拜賓答拜以次奠爵儀如之畢主復位賓遂酬主賓起僎從之執事者斟酒授賓賓授酒詣主前置于席稍退兩拜賓僎主皆拜遂就位坐酒三行湯三品遂徹饌各起離席僎主僚屬居東賓介三賓衆賓居西行兩拜禮遂送賓分東西行乃三揖出庠門而退

十九年詔有司存問高年優恤無告鰥寡孤獨廢篤殘疾者收入孤老歲給所用使得天年所有合行事理條列于後凡民八十九十而鄉黨稱善者有司以時存問若貧無產業年八十以上者月給米五斗肉五

斤酒米三斗九十以上歲加帛一疋絮一斤其有田產能贍者止給歲酒肉絮帛惟應天鳳陽二府富民年八十以上賜爵里士九十以上賜爵社士與縣官平禮復其家冠帶服色別議頒行其鰥寡孤獨不能自給者悉蠲其差徭

二十年命試禮部尚書李原各申諭有司行養老之政

三氏學

魏黃初中于闕里建三氏學專教孔孟顏三氏子孫也唐以來興廢不一宋乾興元年孫興公守充因廟建學請以楊光輔爲講書轉奏禮郎元祐四年尹復奏以文潞公薦爲教授而學正學錄分任其事前代皆孔子後爲之蓋當時教授自置也元世祖中統初立曲阜廟學遴選師儒充孔顏孟三代子孫教授正錄各一員訓其子弟比之常例優加擢用時大司農姚樞請以儒人楊庸教授其三氏子孫入國學者俾

同朝官子列任教官者比常例每減一考入流學舊有田三千畝占于豪民至順中孔思晦理而復之

明宣德中詔三氏教授所學錄保任孔氏一人五十五代克晏爲之後相繼代任

景泰弘治嘉靖隆慶四幸學衍聖公率三代子孫觀禮賜冠帶有差

郡國鄉黨學

遼聖宗統和元年十二月歸州言其居民本新羅所遷未習文字請設學以教許之

道宗清寧元年十二月詔郡縣設學養士頒五經傳疏置博士助教各一員

金世宗大定十六年詔京府設學養士凡十七處共千人初以嘗與廷試及宗室皇家袒免以上親並得解舉人爲之後增州學遂加以五品

以上官曾任隨朝六品官之兄弟子孫餘官之兄弟子孫曾經府薦者同境內舉人補試三之一經府薦及終場免試者不得過二十人凡試補州府學生以提舉學校學官主之曾得府薦及終場舉人皆免試凡經史註疏會課學規一同太學之制

二十九年

章宗已卽位

上封事者乞興學校推行三舍法及鄉以八行貢春官以設制舉宏詞事下尚書省集百官議戶部尚書鄧儼等謂三舍之法起于宋熙寧間王安石其法雖行而多藉勢力尚趨走之弊故蘇軾有三舍旣興貨賂公行之語彼三舍之法委之學官選試啓僥倖之門不可爲法唐文皇養士至八千人亡宋兩學五千人今策論詞賦經義三科取士而太學所養止百六十人外京府或止十人天下僅及千人今若每州設學專除授教月加考試每舉所取數多者賞其學官月試定爲三等籍之一歲中頻在上等者優復之不

率教行惡者黜之庶幾得入之道也上從其議

泰和元年九月更定瞻學養士法郡縣生員給民佃官田六十畝歲支粟三十石

宣宗興定元年尚書省以軍儲不繼請罷州府學生廩給上曰自古文武並用向在中都設學養士猶未嘗廢况今日乎令仍給之

女直學 世宗大定四年以女直大小字譯尚書頒行之後擇猛安謀克內良家子弟爲諸生諸路至三千人 九年取其尤俊秀者百人至京師以編修官溫迪罕締達教之

元世祖中統二年始命置諸路學校官凡諸生進修者嚴加訓誨務使成材以備選用

十三年賽典赤爲雲南行省平章雲南俗無禮義教以拜跪之節婚姻行媒死者爲棺槨奠祭教民播種爲陂池以蓄水濟旱創建孔子廟明

倫堂購經史授學田由是文風稍興

十九年命雲南諸路皆建學以祀先聖

二十三年設江南各道儒學提舉司帝御德興府行宮詔江南學校舊有學田復給之以養士

二十六年九月置高麗國儒學提舉司二十八年令江南諸路學及各縣學內設立小學選老成之士教之其他先儒過化之地名賢經行之所與好事之家出錢粟贍學者並立爲書院凡師儒之命于朝廷者曰教授路府上中州置之命于禮部及行省與宣慰司者曰學正山長學錄教諭州縣及書院置之路設教授學正學錄各一員散府中上州設教授一員下州設學正一員縣設教諭一員書院設山長一員各省設提舉二員正提舉從五品副提舉從七品提舉凡學校之事後改直學考滿爲州吏例以下第舉人充正長備榜舉人充諭錄有薦舉者亦參

用之自京學及州縣學以及書院凡生徒之肄業于是者守令舉薦之臺憲考覈之或用爲教官或取爲吏屬往往人材輩出

陶安曰先王仁愛斯民其政尤要者三治有封建養有井田教有學校三代迹熄首變治養之制惟學校久而益廣漢晉以下學盛于京師而郡縣無定設唐宋以來學布于郡縣而教官無常銓縣倚郭者皆弗克特建附隸郡庠而已今邑必置學學必置官祿雖輕而道則尊勢雖孤而事則專是以儒者試仕願階乎此

至元間段直以功授澤州長官招撫逃民澤爲樂土大修孔子廟置書萬卷迎儒士李俊民爲師以延四方來學者不五六年學之士子以通經被選者百二十有二人朝廷特命提舉本州學校事

成宗大德元年詔各省止存儒學提舉司一餘悉罷之

順帝元統二年詔內外各舉學校

字學 世祖至元六年置諸路蒙古字學命諸路府官子弟入學上路
二人下路二人府一人州一人餘民間子弟上路三十人下路二十五
人願充生徒者許免一身雜役以譯寫通鑑節要頒行各路俾肄習之
醫學 世祖中統二年太醫院使王猷言醫學久廢後世無所師授學
非其傳爲害甚大乃遣副使王安石授以金牌往諸路設立醫學其生
員擬免本身差撥等役俟其學有所成每月試以疑難視其所對優劣
量加勸懲後又定醫學之制設提舉綱維之凡隨朝太醫及醫官子弟
與路府州縣學官並須試驗其各處名醫所述醫經文字悉加考較其
諸藥所產性味真偽悉從辨驗其隨路學校每歲出降十三科疑難題
目具呈太醫院發下諸路醫學令生員依式習課醫業年終製簿解納
送本司以定其優劣

王應麟記略曰醫不可無學岐伯之師曰蹇飯季秦越人之師曰長

桑君倉公之師曰公孫光陽慶然學孰爲要一言蔽之曰仁程子謂
醫書以痿痺爲不仁最善明狀仁者又曰切脉可觀仁仁人心也天
地生生之心人得之以爲心心仁則疾病切身若保赤子萬物一體
也不仁則善不勝利理泊于欲肝膽楚越也以仁存心以心合天如
涪翁之不求報宋清之不爲市寵安常之好施許叔微之陰功精義
入神將得不傳之妙于筌蹄之表其或專己意逆乃曰醫者意也是
猶昧學古入官之訓而曰何必讀書其害不止誤註本草而已
武宗至大五年禁醫人非選試及著籍者毋行醫學

陰陽學 世祖至元十六年始置諸路陰陽學詔江南若有通曉陰陽
之人各路官司詳加取勘依儒學醫學之例每路設教授以訓誨之其
有術數精通者每歲錄呈省府赴都試驗驗中許于司天臺內近侍

明

國初兩京及中都俱設國子監天下府州縣俱設儒學其後裁中都國子監而各都司衛所亦設學

洪武初令在京府學生員六十人在外府學四十人州學三十人縣學二十人日給廩膳聽于民間選補仍免其家差徭二丁

二十年令增廣生員不拘額數

二十五年奏准起取富民原係生員者送應天府學讀書

永樂三年令起取人匠內有生員照例送應天府學

正德十年奏准都司衛所學原定一年一貢者與設優等次等生員各四十名原定二年一貢者與設優等次等生員各二十名原定三年二貢者與設優等次等生員各三十名通行提學官考補以後于優等內照例考選充貢有多餘者俱作附學不堪者不必取足

凡軍舍入學洪武二十七年令武官舍餘年十五以下許入府州縣學

讀書

凡土官入學成化十七年令土官嫡子許入附近儒學

學規 洪武二年詔天下府州縣立學校學者專治一經以禮樂射御書數設科分教 十五年頒禁例于天下學校鐫勒臥碑置于明倫堂之左末爲遵守

考試 洪武二十七年令廩膳十年之上學無成效增廣年二十之上不通義理者皆充吏其托故偽訟革罷不應選者照卷追徵食過廩膳還官本生送吏部充吏

風憲提督

正統元年奏准各處添設按察司副使或僉事一員南北直隸監察御史各一員請勅專一提督學校

景泰元年革罷提學風憲官聽巡按御史各司府州縣提督考察

天順六年復設各處提督學校官

正德十年令口外衛學并各都司衛所土官學離本布政司寫遠提督官不能歲歷者許各道分巡官歲加考校行提學官知會

社學 洪武八年詔有司立社學延師儒以教民間子弟

宗學 萬曆十年宗室之子年十歲以上俱入宗學其師即以本府教授紀善等官選取學行俱優者充之

醫學

明除在京設太醫院外各王府設良醫所良醫正副各府設醫學正科州設典科縣設訓科各率醫生主療治疾疫及犴獄囚人患病諸務

陰陽學

明除在京設欽天監外各府設陰陽學正術州設典術縣設訓術各率陰陽生主申報雨澤救護日月諸務

書院

書院之制昉自石鼓嶽麓白鹿睢陽皆碩德鴻儒講道明教之地世所謂四大書院者是也厥後書院遍天下日增月益星羅而鱗次然多尚虛名而實學荒矣按諸本以淮海列四大書院之中蓋以淮海書院在丹徒疑卽應天書院也不知宋之應天書院乃在歸德府亦或以睢陽名之人以其字之相近遂以睢陽爲淮海非矣又玉海所謂四大書院者有嵩陽而無石鼓今當以玉海爲正

浚儀王氏曰漢初郡國往往有夫子廟而無校官且不置博士弟子員其學士嘗課試供養與否不見經傳然諸儒以明經教于其鄉率從之者數百人其齊魯燕趙之間詩書禮易春秋論語名家者甚盛則設書院昉是矣蓋未修庠序之教士病無所于學相與擇勝地立精舍爲羣居講習之所若岳麓白鹿洞之類是也逮慶曆熙寧之盛

學校之官遂徧天下

宋元

白鹿洞書院在江西南康府廬山五老峰下唐李渤與兄涉俱隱于此後為江州刺史即洞創臺榭南唐昇元中因洞建學館置田以給諸生學者大集以李善道為洞主掌教授當時謂之白鹿國庠

嶽麓書院在湖廣善化縣宋開寶九年潭州守朱洞始創宇于嶽麓山抱黃洞下以待四方學者

應天書院即睢陽書院應天府乃歸德府也宋曰應天金曰歸德宋祥符二年二月二十四日

庚戌詔應天府新建書院以曹誠為助教初有戚同文者通五經業聚徒百餘人許宗度郭承範董循陳象輿王彌滕涉皆其門人于是誠即同文舊居建學舍百五十間聚書千五百餘卷願以學舍入官令同文為舜賓主之故有是命

嵩陽書院在河南登封縣太室山下五代時建宋至道元年七月甲辰賜院額及印本九經書疏

義學


宋侯宣衡陽人少遊四方還家築室道旁俾遊學之士館焉行之二十一年曾無倦色遠近號曰侯家書院

洪文撫南康建昌縣人于所居雷湖北創書舍集學者太宗飛白一軸曰義居以賜之

劉允迪玉山縣人割田劫室聘名士以教族子弟及鄉人願學者號曰劉氏義學

朱文公記略曰今士大夫徒步至三公然一日得志則高堂深池撞鐘舞女所以自樂其身者惟日不足雖廩有餘粟府有餘錢不為里黨灾害足矣義學之舉固未暇及也如劉侯者身雖寵而未登六品

家雖溫而未能千金乃其用心如此可謂賢于人遠矣



續文獻通考鈔卷之十終

文化田成

[Blank page with faint bleed-through text from the reverse side]

